

摘藻堂四庫全書薈要

史部

欽定四庫全書薈要

史部

通典卷十七

八

詳校官員外郎臣楊世綸



欽定四庫全書薈要卷九千一百三十五

史部

通典卷十七

唐 京兆 杜佑 君卿 纂

選舉五

雜論議中

大唐貞觀八年三月詔進士讀一部經史二十三年九月考功員外郎王師旦知貢舉時冀州進士張昌齡王公瑾並有俊才聲振京邑而師旦考其文策黜之舉朝

不知所以及奏等第太宗怪無昌齡等名因召師旦問之對曰此輩誠有詞華然其體輕薄文章浮艷必不成令器臣若擢之恐後生相倣倣有變陛下風雅帝以爲名言後並如其言其年馬周上書曰自古郡守縣令皆妙選賢德欲有擢升必先試以臨人或從二千石入爲丞相今朝廷獨重內官縣令刺史頓輕其選刺史多是武夫勲人或京官不能職方始外出而折衝果毅之內身材強壯者先入爲中郎將其次始補州任邊遠之處



用人更輕其才堪宰涖以德行見擢者十不能一所以  
百姓未安殆由於此高宗顯慶初黃門侍郎劉祥道以  
選舉漸弊陳奏其一曰吏部比來取人傷多且濫每年

入流數過千四百人是傷多

永徽五年一千四百三十人六年一千十八人顯慶

元年一千四百五十人

不簡雜色人卽注官是傷濫

雜色解文三衛內外行署

內外番官親事帳內品子任雜掌伎術直司書手兵部  
品子兵部勲官記室及功曹參軍檢校官屯副驛長校  
尉牧經學時務等比雜色三分不居其一經明行修之

士猶罕有正人多取胥徒之流豈可皆求德行卽知天

下共釐百姓之務者善人少而惡人多爲國以來四十餘載尚未刑措豈不由此且官人非材者本因用人之源濫濫源之所起復由入流人失於簡擇今行署等勞滿唯曹司試判不簡善惡雷同注官但服膺先王之道者奏第始付選趨走几案之間者不簡便加祿秩稽古之業雖則難成斗筭之材傷於易進其雜色應入流人請令曹司試判訖簡爲四等奏聞

量有材用兼有義行者爲第一等身品強

壯及第八上并兵部所送人不占第一等及准例第一給送兵部者爲第二等餘量簡爲第三第四等

等付吏部第二等付兵部第三等付主爵第四等付司  
勲並准例處分其行署等私犯下第公坐下下雖經赦  
降情狀可責者亦量配三司不經赦降者放還本貫冀  
入流不濫官皆得人非材不取不至冗雜且令胥徒之  
輩知有銓選若復素非廉謹必將漸自飭勵其二曰古  
之選者爲官擇人不聞擇人多而官員少今之選者亦  
擇人但擇之無准約官員有數入流無限以有數供無  
限人隨歲積豈得不賸謹准約所須人量支年別入流

數今内外文武官一品以下九品以上一萬三千四百六十五員略舉大數當一萬四千人人之賦命自有修促弱冠而從政懸車而致仕五十年食祿者罕見其人壯室而仕耳順而退亦取其中數不過支三十年此則一萬四千人三十年而略盡若年別入流者五百人經三十年便得一萬五千人定須者一萬三千四百六十五人足充所須之數况三十年之外在官者猶多此便足有賸人不慮其少今每年入流者遂至一千四百餘

人應須五百數外常賸一倍以上又比來放還者見停  
亦千餘人更復年別新加實非搜揚之法其三曰雜色  
人請與明經進士通充入流之數以三分論每二分取  
明經進士一分取雜色人其四曰儒爲教化之本學者  
之宗儒教不興風俗將替今庠序徧於四海儒生溢於  
三學勸誘之方理實爲備而獎進之道事或未周但永  
徽以來於今八載在官者以善政粗聞論事者以一言  
可採莫不光被諭旨超升不次而儒生未聞恩及臣故

以爲獎進之道未周其五曰國家富有四海於今已四十年百姓官寮未有秀才之舉未知今人之不如昔將薦賢之道未至豈使方稱多士遂闕斯人請六品以下爰及山谷特降綸言更審搜訪仍量爲條例稍加優獎不然赫赫之辰斯舉遂絕一代盛事實爲朝廷惜之其六曰唐虞三載考績三考黜陟幽明兩漢用人亦久居其職所以因官命氏有倉庾之姓魏晉以來事無可紀今之在任四考即遷官人知將秩滿豈無去就百姓見

官人遷代必懷苟且以去就之人臨苟且百姓責其移

風易俗必無得理請四考依選法就任所加階至八考

滿然後聽選

嶺南及瘴癘之所四考不得替者不在此限例若計至五品及有中上以上私犯中

下公坐上下以下考者四考滿依舊置替得替人依式聽選

還淳反朴雖未敢期送

故迎新實減其勞擾其七曰尚書省二十四司及門下

中書主事等比來選補皆取舊任流外有刀筆之人欲

參用經學時務之流皆以儔類爲恥前後相承遂成故

事但禁省崇峻王言秘密尚書政本人物攸歸而多用

胥徒之人恐未盡銓衡之理請降進止稍清其選奉勅  
付所司集羣官詳議議者多難於改作事竟不行三年  
七月上謂宰臣曰四海之廣唯在得賢卿等用人多作  
形迹讓避親知不得盡意甚爲不取昔祁奚舉子古人  
以爲美談即使卿等兒姪有才亦須依例進奉乾封八  
年八月上列侍臣責以不進賢良宰相李安期進曰臣  
聞聖帝明王莫不勞於求賢逸於任使且十室之邑必  
有忠信況天下之廣豈無英彥但比來公卿有所薦引



即遭囂謗以爲朋黨沉屈者未伸而在位者已損所以  
人思苟免競爲緘默若陛下虛已招納務於搜訪不忌  
親讎唯能是用讒毀不入誰不竭誠此皆事由陛下非  
臣等所能致也上深然之上元元年劉嶢上疏曰國家  
以禮部爲考秀之門考文章於甲乙故天下響應驅馳  
於才藝不務於德行夫德行者可以化人成俗才藝者  
可以約法立名致有朝登科甲而夕陷刑辟制法守度  
使之然也陛下焉得不改而張之至如日誦萬言何關

理體文成七步未足化人昔子張學干祿仲尼曰言寡  
尤行寡悔祿在其中矣又曰行有餘力則以學文今舍  
其本而循其末況古之作文必諧風雅今之末學不近  
典謨勞心於草木之間極筆於煙雲之際以此成俗斯  
大謬也昔之採詩以觀風俗詠卷耳則忠臣喜誦蓼莪  
而孝子悲溫良敦厚詩教也豈主於淫文哉夫人之愛  
名如水之就下上有所好下必甚焉陛下若以德行為  
先才藝爲末必敦德勵行以佇甲科豐舒俊才沒而不

齒陳寔長者拔而用之則多士雷奔四方風動風動於  
下聖理於上豈有不變者歟武太后臨朝垂拱中納言  
魏元同以爲吏部選舉未盡得人之術上疏曰昔之列  
國今之郡縣士無常君人有定主自求臣佐各選英賢  
大臣乃命於王朝耳秦并天下罷侯置守漢氏因之有  
沿有革諸侯得自置吏四百石以下其傅相大官則漢  
爲置之州郡掾史督郵從事悉任之於牧守爰自魏晉  
始歸吏部遞相因循以迄於今以刀筆求才以簿書察

行法之弊久矣蓋君子重因循而憚改作有不得已者亦當運獨見之明定卓然之議如今選司所行者非上皇之令典乃近代之權道所宜遷革實爲至要何以言之夫尺丈之量所及不永鍾庾之器所積不多非其所及曷能度之非其所受何以容之況天下之大士人之衆而可委之數人之手乎假使平如權衡明如水鑑力有所極照有所窮銓綜既多紊失斯廣況比居此任時有非人而徇於勢利者哉使贓貨交易同乎市井加以

厚貌深衷險如丘陵使百行九流折之於一面具僚庶  
品專斷於一司不亦難乎且前古以來亂多治少武德  
貞觀與今亦異皇運之初庶事草創豈唯日不暇給亦  
乃人物稀少天祚大聖享國永年比屋可封異人間出  
咸以爲有道恥賤得時無怠諸色入流年以千計羣司  
列位無復新加官有常員人無定限選集之始霧積雲  
屯擢敘於終十不收一淄澠混淆玉石不分用舍去留  
得失相半既即事爲弊致後來滋甚夫夏殷以前制度

多闕周監二代煥乎可睹豈當諸侯之臣不皆命於天子王朝庶官亦不可專於一職故穆王以伯冏爲太僕正命之曰慎簡乃僚無以巧言令色便僻側媚其唯吉士此則令其自擇下吏之文也太僕正中大夫耳尚以僚屬委之則三公九卿亦然矣周禮太宰內史並掌爵祿廢置司徒司馬別掌興賢詔事當是分任於羣司而統之以數職各自求其小者而王命其大者也昔區區宋朝尚爲裴子野所歎而況於當今乎又從政涖官不

可以無學學古入官議事以制傳曰我聞學以從政不  
聞以政入學今貴戚子弟例早求官或齠齔之年已腰  
銀艾或童丱之歲已襲朱紫弘文崇賢之生千牛輦脚  
之徒課試既淺技能亦薄而門閥有素資望自高夫象  
賢繼及古之道也所謂胄子必裁諸學修六禮以節其  
性明七教以興其德少則受業長而出仕並由德進必  
以才升然後可以利用賓王移家事國少仕則廢學輕  
試則無才於其一流良足惜也又勲官三衛流外之徒

不待州縣之舉直取之於書判恐非先德行而後言才之義也臣竊見制書每令三品薦士下至九品亦令舉人此聖朝側席旁求之意也但以褒貶不甚明得失無大隔故人上不憂黜責下不盡搜揚苟以應命莫慎所舉且惟賢知賢聖人篤論伊尹既舉不仁咸遠復患階秩雖同人才異等身且濫進鑒豈知人今欲務得實才兼宜擇其舉主流清以源潔影端由表正不詳舉主之行能而責舉人之庸濫不可得也武太后不納天授三



年右補闕薛謙光以其時雖有學校之設禁防之制而風俗流弊皆背本而趨末矯飾行能以請託奔馳爲務上疏曰自七國以來雖雜以縱橫而漢興求士猶徵百行是以禮讓之士砥才毓德既閭里推高然後爲府寺所辟而魏氏取人好其放達晉宋之後祇重門資獎爲人求官之風乖授職惟賢之義梁陳之間時好詞賦故其俗以詩酒爲重未嘗以修身爲務降及隋室餘風尚存開皇中李諤奏於文帝曰昔魏之三祖更好文詞忽

君人大道好雕蟲小藝連編累牘盈箱積案獨有月露  
風雲之狀而已代俗以之相高朝廷以茲擢人故文筆  
日煩其政日亂帝納其言乃下制禁文筆之爲浮詞者  
其年泗州刺史司馬幼之以表詞不質書罪於是風俗  
改勵政化大行及煬帝又變前法置進士等科故後生  
復相倣效皆以浮虛爲貴有唐纂歷漸革前弊陛下君  
臨樹本崇化而今之舉人有乖事實鄉議決小人之筆  
行修無長者之論策第喧競於州府祈恩不勝於拜伏

或明制適下試令搜揚則驅馳府寺請謁權貴陳詩奏  
記希咳唾之澤摩頂至足冀提携之恩故俗號舉人爲  
覓舉夫覓者自求之稱非人知我之謂也察辭度材則  
人品可見矣故選曹授職誼囂於禮闈州郡貢士諍訟  
於陞聞謗議紛紜寢成風俗今夫舉人詢於鄉閭歸於  
里正而已雖跡虧名教罪加刑典或冒籍竊資邀勲盜  
級假其賄賂即爲無犯鄉閭設如才應經邦唯令試策  
武能制敵只驗彎弧文擅清竒則登甲科藻思小減則

爲不第以此收人恐乖事實何者樂廣假筆於安仁靈  
運詞高於穆之平津文劣於長卿子建藻麗於荀彧若  
以射策爲官則潘謝曹馬必居孫樂之右協贊機猷則  
安仁靈運亦無裨附之益由此言之固不可一槩而取  
也其武藝亦然故謀將不長於弓馬良相寧資於射策  
伏願陛下降明制頒峻刑文則試以理官武則令其守  
禦使僥名濫吹之伍無所藏其庸謬臣謹按吳起臨戰  
左右進劔吳子曰夫臨難決疑乃將事也一劔之任非

將事也又按諸葛亮臨戎不親戎服頓蜀兵於渭南司馬宣王持劔勁卒不敢當此豈弓矢之用乎又按楊得意誦長卿之文武帝曰恨不得與此人同時及相如至終於文園令不以公卿之位處之者蓋非其任故也又按漢法所舉之主終身保任揚雄之坐田儀責其冒薦成子之居魏相酬於得賢賞罰之令行則請謁之心絕遜讓之義著則貪競之路塞矣仍請寬立年限容其採訪簡汰堪用者試守令以觀能否參檢行事以覈是非

稱職者受薦賢之賞濫舉者抵欺罔之罪自然舉得才行而君子之道長矣聖歷三年二月武太后令宰相各舉尚書郎一人狄仁傑獨薦男光嗣由是拜地官尚書郎莅事有聲太后謂仁傑曰祁奚內舉果得人也長安二年武太后下求賢令狄仁傑曰荊州長史張柬之其人雖老真宰相才也乃召爲洛州司馬他日又求賢仁傑曰臣前言張柬之太后曰已遷之矣對曰臣薦之請爲相也今爲洛州司馬非用之又遷秋官侍郎四年夏

官尚書靈武大總管姚元之將之鎮太后令舉堪爲宰相者元之對曰秋官侍郎張東之沈厚有餘能斷大事且其人年老惟陛下急用之遂爲相開元三年左拾遺張九齡上書夫元元之衆莫不懸命於縣令宅生於刺史此其尤親於人者也是以親人之任宜得賢才用人之道宜重其選而今刺史縣令除京輔近處之州刺史猶擇其人縣令或備員而已其餘江淮隴蜀三河諸處除大府之外稍非其才但於京官之中爲閒散者或是

緣身有累在職無聲用於牧守之間以爲斥逐之地因  
勢附會遂忝高班比其勢衰亦爲刺史至於武夫流外  
積資而得官成於經久不計其才諸若此流盡爲刺史  
其餘縣令以下固不可勝言蓋毗庶所繫國家之本務本  
之職反爲好進者所輕承弊之邑每爲非才者所擾而  
欲天下和洽固不可得也古者刺史入爲三公郎官出  
宰百里莫不互有所重勸其所行臣竊怪近俗偏輕此  
任今朝廷卿士入而不出於其私情甚自得計何則京



華之地衣冠所聚子弟之間身名所出從容附會不勞而成一出外藩有異於是人情進取豈忘之於私但法制之不敢違耳原其本意固私是欲今大利於京職而不在外郡如此則智能之士欲利之心日夜營營安肯復出爲刺史縣令而國家之利方賴智能之人此輩既自固而不行在外者又技癢而求入如此則智能之輩常無親人之日今又未革之以法無乃甚不可乎故臣以爲欲理之本莫如重刺史縣令此官誠重智能者可

行正宜懸以科條定其資歷凡不歷都督刺史雖有高第不得入爲侍郎列卿不歷縣令雖有善政亦不得入爲臺郎給舍雖遠處都督刺史至於縣令遞次差降以爲出入亦不十年頻任京職又不得十年盡任外官如此設科以救其失則內外通理萬姓獲安如積習爲常遂其私計天下不可爲理也又古之選用賢良取其稱職或遙聞而辟召或一見而任之是以士修素行不圖僥倖今天下未必理於上古而事務日倍於前誠以不

正其本而設巧於末也所謂末者吏部條章動盈千萬  
刀筆之吏辨析毫釐節制搶攘溺於文墨胥徒之猾又  
緣隙而起臣以爲始造簿書以備人之遺忘耳今反求  
精於案牘不急於人才亦何異遺劍中流而刻舟以記  
去之彌遠可爲傷心凡稱吏部之能者則曰從縣尉與  
主簿從主簿與縣丞斯選曹執文而善知官次者也唯  
據其合與不合而多不論賢與不肖大略如此豈不謬  
哉陛下若不以吏部尚書侍郎爲賢必不授之以職事

尚書侍郎既以賢而受委豈復不能知人之賢人之難知雖自古所慎而拔十得五其道可行今則執以格條貴於謹守幸其心能自覺者每選所拔亦有三五人若又專固者則亦一人不拔據資配職自以爲能爲官擇人初無此意故使時人有平配之議官曹無得才之實故臣以爲選部之弊在不變法變法甚易在陛下渙然行之假如今之銓衡欲自爲意亦限行之以久動必見疑遂用因循益爲浮薄今若刺史縣令精覈其人即每

年當管之內應有合選之色且先委曲考其才行堪入品流然後送臺臺又推據所用之多少爲州縣之殿最一則州縣慎於所舉必取入官之才二則吏部因其有成無多庸人干冒縱有不任選者謬起怨端且猶分謗於外臺不至誼譁於南省今則每歲選者動以萬計京師米物爲之空虛豈多士若斯蓋冒濫至此而欲仍舊致理難於改制祇益法令煩碎賢愚混雜就中以一詩一判定其是非適使賢人君子從此遺逸斯亦明代之

闕政有識之所歎息也又天下雖廣朝廷雖衆而士之明賢誠可知也若使毀稱相亂聽受不明事將已矣無復可說如知其賢能各有品第每一官缺而不以次用之則是知而不爲焉用彼相借如諸司清要之職當用第一之人及其要官闕時或以下等叨進以故時議無高無下唯論得與不得自然清議不立名節不修善士則守志而俟時中人則躁求而易操其故何哉朝廷若以令名進人士子亦以修身獲利而利之所出衆則趨

馬已而名利不出於清修所趨多歸於人事其小者苟  
求取得一變而至阿私其大者許以分義再變而成朋  
黨斯並教化漸漬使之必然故於用人之際不可不第  
其高下若高下有次不可謬于夫士必刻意修飾思齊  
日衆刑政自清此皆興衰之大端安可不察也十七年  
三月國子監祭酒楊湯上言伏聞承前之例每年應舉  
常有千數及第兩監不過一二十人臣恐三千之徒虛  
費官廩兩監博士濫縻天祿竊見入仕諸色出身每歲

向二千餘人方於明經進士多十餘倍自然服勤道業之士不及胥吏以其効官豈識先王之禮義陛下設學校務以勸進之有司爲限約務以黜退之臣之微誠實所未曉今監司課試十已退其八九考功及第十又不收一二長以此爲限恐儒風漸墜小道駸興若以出身人多應須諸色都減豈在獨抑明經進士也上然之左監門衛錄事參軍劉秩論曰王者官人必視國之要杜諸戶一其門安平則尊經術之士有難則貴介冑之



臣夏殷周選士必於庠序非其道者莫得仕進是以誘人也無二其應之者亦一及周之末諸侯異政取人多方故商鞅患之說秦孝公曰利出一孔者王利出二孔者強利出三孔者弱於是下令非戰非農不得爵位秦卒以是能并吞六國漢室干戈以定禍亂貴尚淳質高后舉孝悌力田文景守而不變故下有常業而朝稱多士及孝武察孝廉置五經博士弟子雖門開二三而未失道德也逮至晚歲務立功名銳意四夷故權譎之謀

設荆楚之士進軍旅相繼官用不足是以聚歛計料之  
政生設險興利之臣起番係嚴熊羆等經營作渠以通  
漕運東郭偃孔僅建鹽鐵諸利策富者冒爵射官免刑  
除罪公用彌多而爲官者徇私上下並求百姓不堪刑  
弊故巧法慘急之臣進而見知廢格之法作杜周減宣  
之屬以峻文決理貴而王溫舒之徒以鷹擊敢殺彰而  
法先王之術習俎豆之容者無所任用由是精通秀穎  
之士不遊於學遊於學者率章句之儒也是以昭帝之

時霍光問人疾苦不本之於太常諸生徵天下賢良文學以訪之是常道不足以取人也至於東漢光武好學不能施之於政乃躬自講經肅宗以後時或祖述尊重儒術不達其意而酌其文三公尚書雖用經術之士而不行經術之道是以元成以降迄於東漢慷慨通方之士寡廉隅立節之徒衆無何漢氏失馭曹魏僭竊中正取士權歸著姓雖可以鎮伏眈庶非尚賢之術蓋尊尊之道於時聖人不出賢哲無位詩道大作怨曠之端也

洎乎晉宋齊梁遞相祖習其風彌盛舍學問尚文章小  
仁義大放誕談莊周老聃之說誦楚詞文選之言六經  
九流時曾閱目百家三史罕聞於耳撮羣抄以爲學總  
衆詩以爲資謂善賦者廊廟之人雕蟲者台鼎之器下  
以此自負上以此選材上下相蒙持此爲業雖名重於  
當時而不達於從政故曰取人之道可以敦化周書曰  
以言取人人謁其言以行取人人謁其行取人之道不  
可不慎也原夫詩賦之意所以達下情所以諷君上上

下情通而天下亂者未之有也近之作者先文後理詞  
治不雅既不關於諷刺又不足以見情蓋失其本又何  
爲乎隋氏罷中正舉選不本鄉曲故里閭無豪族井邑  
無衣冠人不土著萃處京畿士不飾行人弱而愚夫古  
者以勲賞功以才蒞職以才蒞職是以職與人宜近則  
以職賞功是以官與人乖古者計人而貢士計吏而用  
人故士無不官官無乏吏近則官倍於古士十於官求  
官者又十於士故士無官

後魏羽林士今萬騎軍功是也官乏祿吏擾

人古者王畿千里千里之外封建諸侯諸侯之吏自卿  
以降各自舉任當乎漢室除保傅將相餘盡專之州縣  
佐史則皆牧守選辟夫公卿者主相之所任也甸外之  
官吏者又諸侯牧守之事也然則主司之所選者獨甸  
內之吏公卿府之屬耳豈不寡哉所選既寡則焉得不  
精近則有封建而無國邑五服之內政決王朝一命免  
拜必歸吏部按名授職猶不能遣何暇採訪賢良搜覈  
行能耶時皆共嗤其失而不知失之所以故備詳之又

曰夫官有大小材有短長長者任之以大官短者任之以小職職與人相宜而功與事並理是以孟公綽爲趙魏老則優不可以爲滕薛大夫近之任官其選之也略其使之也備一人之身職無不莅若委游夏以政事責冉季以文學也何其謬歟故人失其長官失其理是以三代之制家有代業國有代官孔子曰醫不三世不服其藥史墨曰古之爲官代守其業朝夕思之一朝失業死則及焉是知業不代習則其事不精此周之所以得

人也昔義氏和氏掌天地劉氏代授龍籍氏代司史庾氏庫氏代司出納制氏代司鑄鐘即其事也後代以代卿執柄益私門卑公室齊奪於田氏魯弱於三家革代卿之失而不復代業之制醫工筮數其道浸微蓋爲此也故老子曰聖人常善救人故無棄人常善救物故無棄物不善用人者譬若使驥捕鼠令鷹守肉驥之捕鼠終不可獲而千里之功廢矣鷹之守肉死有餘罪而攫撮之効沒矣夫裁徑尺之帛刻方寸之木不任左右必



求良工者裁帛刻木非左右之所能故也徑尺之帛方寸之木薄物也非良工不能裁之況帝王之佐經國之任可不審擇其人乎故構大廈者先擇木然後揀材理國家者先擇佐然後守人大匠構屋必以大材爲棟梁小材爲榱桷苟有所中尺寸之木無棄此善理木者也洋州刺史趙匡舉選議曰昔三代建侯與今事異理道損益請自漢言之漢朝用人自詔舉之外其府寺郡國屬吏皆令自署故天下之士修身於家而辟書交至以

此士務名節風俗用修魏氏立九品之制中正司之於是族大者第高而寒門之秀屈矣國朝舉選用隋氏之制歲月既久其法益訛夫才智因習就固然之理進士者時共貴之主司褒貶實在詩賦務求巧麗以此爲賢不唯無益於用實亦妨其正習不唯撓其淳和實又長其佻薄自非識度超然時或孤秀其餘溺於所習悉昧本源欲以啓導性靈獎成後進斯亦難矣故士林鮮體國之論其弊一也又人之心智蓋有涯分而九流七畧

書籍無窮主司徵問不立程限故修習之時但務鈔畧  
比及就試偶中是期業無所成固由於此故當代寡人  
師之學其弊二也疏以釋經蓋筌蹄耳明經讀書勤苦  
已甚既口問義又誦疏文徒竭其精華習不急之業而  
當代禮法無不面牆及臨人決事取辦胥吏之口而已  
所謂所習非所用所用非所習者也故當官少稱職之  
吏其弊三也舉人大率二十人中方收一人故沒齒而  
不登科者甚衆其事難其路隘也如此而雜色之流廣

通其路也此一彼十此百彼千揆其秩序無所差降故  
受官多底下之人修業抱後時之歎待不才者何厚處  
有能者何薄崇末抑本啓昏窒明故士子舍學業而趨  
末伎其弊四也收人既少則爭第急切交馳公卿以求  
汲引毀訾同類用以爭先故業因儒雅行成險薄非受  
性如此勢使然也浸以成俗虧損國風其弊五也大抵  
舉選人以秋初就路春末方歸休息未定聚糧未辦即  
又及秋事業不得修習益令藝能淺薄其弊六也羈旅

往來糜費實甚非唯妨闕正業蓋亦墮其舊產未及數  
舉索然已空其弊七也貧窶之士在遠方欲力赴京師  
而所冀無際以此揆度遂至沒身使茲人有抱屈之恨  
國家有遺才之闕其弊八也官司運江淮之儲計五費  
其四乃達京邑芻薪之貴又十倍四方而舉選之人每  
年攢會計其人畜蓋將數萬無成而歸十乃七八徒令  
關中煩耗其弊九也爲官擇人唯才是待今選司並格  
之以年數合格者判雖下劣一切皆收如未合格而應

科目者纔有小瑕莫不見棄故無能之士祿以例臻才俊之流坐成白首此非古人求賢審官之義亦已明矣其弊十也選人不約本州所試悉令聚於京師人既浩穰文簿繁雜因此渝濫其事百端故俗間相傳云入試非正身十有三四赴官非正身十有二三此又弊之尤者今若未能頓除舉選以從古制且稍變易以息弊源則官多佳吏風俗可變其條例如後

舉人條例○一立身入仕莫先於禮尚書明王道論語

詮百行孝經德之本學者所宜先習其明經通此謂之  
兩經舉論語孝經爲之翼助諸試帖一切請停唯令策  
試義及口問其策試自改問時務以來經業之人鮮能  
屬綴以此少能通者所司知其若此亦不於此取人故  
時人云明經問策禮試而已所謂變實爲虛無益於政  
今請令其精習試策問經義及時務各五節並以通四  
以上爲第但令直書事義解釋分明不用空寫疏文及  
務華飾其十節總於一道之內問之餘科准此其口問

諸書每卷問一節取其心中了悟解釋分明往來問答  
無所滯礙不用要令誦疏亦以十分通八以上爲第諸  
科亦准此外更通周易毛詩名四經舉加左氏春秋爲  
五經舉不習左氏者任以公羊穀梁代之其但習禮記  
及論語孝經名一經舉既立差等隨等授官則能否區  
分人知勸勉○一明法舉亦請不帖但策問義并口問  
准經業科○一學春秋者能斷大事其有兼習三傳參  
其異同商確比擬得其長者謂之春秋舉策問經義并



口問並准前○一進士習業亦請令習禮記尚書論語

孝經并一史其雜文請試兩首共五百字以上六百字  
以下試箋表論議銘頌箴檄等有資於用者不試詩賦  
其理通其詞雅爲上理通詞平爲次餘爲否其所試策  
於所習經史內徵問經問聖人旨趣史問成敗得失并  
時務共十節貴觀理識不用徵求隱僻詰以名數爲無  
益之能言詞不至鄙陋卽爲第○一有通禮記尚書論  
語孝經之外更通道德諸經通元經孟子荀卿子呂氏

春秋管子墨子韓子謂茂才舉達觀之士既知經學兼有諸子之學取其所長捨其偏滯則於理道無不該矣試策徵問諸書義理并時務共二十節仍與之言論觀其通塞○一其有學兼經史達於政體策畧深致其詞典雅者謂之秀才舉經通四經或三禮或三家春秋兼通三史以上即當其目其試策經問聖人旨趣史問成敗得失并時務共二十節仍與之談論以究其能○一學倍秀才而詞策同之談論貫通究識成敗謂之宏才

舉以前三科其策當詞高理備不可同於進士其所徵問每十節通八以上爲第○一其史書史記爲一史漢書爲一史後漢書并劉昭所注志爲一史三國志爲一史晉書爲一史李延壽南史爲一史北史爲一史習南史者兼通宋齊志習北史者通後魏隋書志自宋以後史書煩碎冗長請但問政理成敗所因及其人物損益關於當代者其餘一切不問國朝自高祖以下及睿宗實錄并貞觀政要共爲一史○一天文律歷自有所司

專習且非學者卒能尋究並請不問唯五經所論蓋舉其大體不可不知○一每年天下舉人來秋入貢者今年九月州府依前科目先起試其文章通者注等第訖試官本司官錄事參軍及長史連押其後其口問者題策後云口問通若干即相連印縫並依寫解爲先後不得參差封題訖十月中旬送觀察使觀察使差人都送省司隨遠近比類須合程限省司重考定訖其入第者二月內符下諸道諸州追之限九月內盡到到即重試

之其文策皆勘會書跡調理與州試同即收之僞者送  
法司推問其國子監舉人亦准前例○一諸色身名都  
不涉學昧於廉耻何以居官其簡試之時雖云試經及  
判其事苟且與不試同請皆令習孝經論語其孝經口  
問五道論語口問十道須問答精熟知其義理並須通  
八以上如先習諸經書者任隨所習試之不須更試孝  
經論語其判問以時事取其理通必在責其重保以絕  
替代其合外州申解者依舉選例處分○一一經及第

人選日請授中縣尉之類判入第三等及蔭高授上縣尉之類兩經出身授上縣尉之類判入第三等及蔭高授緊縣尉之類用蔭止於此其以上當以才進四經出身授緊縣尉之類判入第三等授望縣尉之類五經授望縣尉之類判入第三等授畿縣尉之類明法出身與兩經同資進士及三禮舉春秋舉與四經同資其茂才秀才請授畿尉之類其宏才諸送詞策上中書門下請授諫官史官等禮經舉人若更通諸家禮論及漢已來

禮儀沿革者請便授太常博士茂才等三科爲學既優  
並准五經舉人便授官其雜色出身人量書判授中縣  
尉之類判入第三等及蔭高者加一等凡蔭除解褐官  
外不在用限○一其今舉人所習既從簡易士子趨學  
必當數倍往時每年諸色舉人主司簡擇常以五百人  
爲大限此外任收雜色

選人條例○一其前資官及新出身並請不限選數任  
集庶有才無滯官得其人○一不習經史無以立身不

習法理無以効職舉人出身以後當宜習法其判問請  
皆問以時事疑獄令約律文斷決其有既依律文又約  
經義文理弘雅超然出羣爲第一等其斷以法理參以  
經史無所虧失粲然可觀爲第二等判斷依法有文彩  
爲三等頗約法式直書可否言雖不文其理無失者爲  
第四等此外不收但如曹判及書題如此則可不得拘  
以聲勢文律翻失其真故合於理者數句亦收乖於理  
者詞多亦捨其倩人暗判人間謂之判羅此最無恥請



勝以懲之○一其授試官及員外等若悉不許選恐抱  
才者負屈若並令集則僥倖者頗多當酌事宜取其折  
衷請令所在審加勘責但無渝濫並准出身人例試判  
送省授官其九品八品官請同黃衣選人例授官七品  
六品依前資解褐官例五品四品依前資第二正官例  
其官好惡約之工拙也○一舊法四品五品官不復試  
判者以其歷任既久經試固多且官班已崇人所知識  
不可復為偽濫耳自有兵難仕進多門僥倖超擢不同往

日並請試判待三五年舉選路清然後仍依舊法其曾登科及有清白狀并曾任臺省官并諸司長官判史者已經選擇並不試依常例處分○一每年天下來冬選人今秋九月依舉人召集審勘絕其姦濫試時長吏親自監臨皆分相遠絕其口授及替代其第四等以上封送省皆依舉人例處置吏部計天下闕員訖即重考天下所送判審定等第訖從上等據本色人數收人具名下本道觀察使追之限十月內到並重試之訖取州試

判類其書蹤及文體有僞濫准法處分其合留者依科目資緒隨穩便注擬○一其兩都選人不比外州請令省司自試隔年先試一同外州東都選人判亦將就上都考定等第兼類會人數明年依例追集重試之還以去秋所試驗其書蹤及詞理則隔年計會替代事亦難爲○一兵興以來士人多去鄉土既因避難所在寄居必欲網羅才能隔年先試令歸本貫爲弊更深其諸色舉選人並請准所在寄莊住處投狀請試舉人既不慮

僞濫其選人但勘會符告并責重保知非僞濫即准例處分○一宏詞拔萃以甄逸才進士明經以長學業並請依常年例其平選判入第二等亦任超資授官○一諸以廕緒優勞准勅授官者如判劣惡者請授員外官待稍習法理試判合留即依資授正員官○一諸合授正員官人年未滿三十者請授無職事京官及外州府參軍不得授職事官

後論○有司或詰於議者曰吏曹所銓者四謂身言書

判今外州送判則身言闕矣如何對曰夫身言者豈非  
洪範貌言乎貌謂舉措可觀言謂詞說合理此皆才幹  
之士方能及此今所試之判不求浮華但令直書是非  
以觀理識於此既蔽則無貌言斷可知矣書者非理人  
之具但字體不至乖越即爲知書判者斷決百事真爲  
吏所切故觀其判則才可知矣彼身言及書豈可同爲  
銓序哉有司復詰曰王者之盛莫逾堯舜書稱敷納以  
言爲求才之通軌今以言爲後亦有說乎對曰敷納以

言者謂引用賢良升於達位方將詢以庶政非言無以知之其唐虞百官咨俞無幾其下小吏官長自求各行敷納事至簡易今吏曹所習輒數千人三銓藻鑑心

難溥訓喧競之不暇又何敷納之有乎其茂才以上學業既優可以言政教接以談論近於敷納矣有司復曰士有言行不差而闕於文學或頗有文學而言行未脩但以諸科取之無乃未備對曰吏曹所銓必求言行得之既審然後授官則外州遙試未爲通矣今銓衡之下

姦濫所萃紛爭劇於獄訟僞濫深於市井法固至此無  
如之何豈若外州先試兼察其行苟居宅所在則隣伍  
知之官司耳目易於採聽古人鄉舉里選方斯近矣且  
今之新法以學舉者一經畢收以判選者直書可否可  
謂易矣修言行者心當敦固不能爲此餘何足觀若有  
志性過人足存激勸及躬爲惡行不當舉用者則典章  
已備但舉而行之耳故無云焉有司復曰其人効官公  
清且有能政以其短於詞判不見褒陞無乃闕於事實

乎對曰苟能如此最爲公器使司善狀國有常規病在不行耳但今諸道觀察使每年終必有褒貶不得僭濫則善不蔽矣問曰試帖經者求其精熟今廢之有何理乎對曰夫人之爲學帖易於誦誦易於講今口問之令有講釋若不精熟如何應對此舉其難者何用帖爲且務於帖則於義不專非演智之術固已明矣夫帖者童稚之事今方授之以職而待以童稚於理非宜有司復曰舊法口問並取通六今令通八無乃非就易之義乎



答曰所習者少當務其精止於通六失在鹵莽是以然耳復曰舉人試策例皆五通今并爲一有何理對曰夫事尚實則有功狗虛則益寡試策五通多書問目數立頭尾狗虛多矣豈如一策之內并問之乎

通典卷十七

欽定四庫全書薈要卷九千一百三十六

史部

通典卷十八

唐京兆杜佑君卿纂

選舉六

雜議論下

禮部員外郎沈既濟論曰計近代以來爵祿失之者久矣其失非他在四太而已何者入仕之門太多代胄之家太優祿利之資太厚督責之令太薄請徵古制以明

之管子曰夫利出一孔者其國無敵出二孔者其兵不  
詘出三孔者不可以舉兵出四孔者其國必亡先王知  
其然故塞人之養隘其利途使人無游事而一其業也  
而近代以來祿利所出數十百孔故人多岐心疏瀉漏  
失而不可轄也夫入仕者多則農工益少農工少則物  
不足物不足則國貧是以言入仕之門太多禮曰天子  
之元子士也天下無生而貴者則雖儲貳之尊與士伍  
同故漢王良以大司徒位免歸蘭陵後光武巡幸始復

其子孫邑中徭役丞相之子不得蠲戶課而近代以來  
九品之家皆不征其高蔭子弟重承恩獎皆端居役物  
坐食百姓其何以堪之是以言代胄之家太優先王制  
士所以理物也置祿所以代耕也農工商有經營作役  
之勞而士有勤人致理之憂雖風猷道義士伍爲貴其  
苦樂利害與農工商等不甚相遠也後代之士乃撞鐘  
鼓樹臺榭以極其歡而農工鞭臂背役筋力以奉其養  
得仕者如昇仙不仕者如沈泉歡娛憂苦若天地之相

遠也夫上之奉養也厚則下之徵斂也重養厚則上覲其欲斂重則下無其聊故非類之人或沒死以趣上構姦以入官非唯求利亦以避害也是以言祿利之資太厚語曰陳力就列不能者止昔李膺周舉爲刺史守令畏憚觀風投印綬者四十餘城夫豈不懷祿而安榮哉顧漢法之不可偷也自隋變選法則雖甚愚之人蠕蠕然第能乘一勞結一課獲入選叙則循資授職族行之官隨列拜揖藏俸積祿四周而罷因緣侵漁抑復有焉

其罷之日必妻孥華楚僕馬肥腴而偃仰乎士林之間  
及限又選終而復始非爲巨害至死不黜故里語謂人  
之爲官若死然未有了而倒還者爲官如此易享祿  
如此厚上法如此寬下斂如此重則人孰不違其害以  
就其利者乎是以言督責之令太薄既濟以爲當輕其  
祿利重其督責使不才之人雖虛座設位置印綬於旁  
揖讓而進授之不敢受寬其征徭安其田里使農商百  
工各樂其業雖以官誘之而莫肯易如此則規求之志

不禁而息多士之門不扃而閉若上不急其令下不寬其徭而欲以法術遮列禁人奸冒此猶坯土以壅橫流也勢必不止夫古今選用之法九流常叙有三科而已曰德也才也勞也而今選曹皆不及焉何以言之且吏部之本存乎甲令雖曰度德居官量才授職計勞升秩其文具矣然考校之法皆在判書簿歷言詞俯仰之間侍郎非通神不可得而知之則安行徐言非德也麗藻芳翰非才也累資積考非勞也苟執此不失猶乖得人



况衆流茫茫耳目有不足者乎蓋非鑒之不明非擇之不精法使然也先朝數人以下言之詳矣是以文皇帝病其失而將革焉夫物盈則虧法久終弊雖文武之道亦與時張弛五帝三王之所以不相沿也是以王者觀變以制法察時而立政按前代選用皆州府察舉及年代久遠訛失滋深至於齊隋不勝其弊凡所置署多由請託故當時議者以爲與其率私不若自舉與其外濫不若內收是以罷州府之權而歸於吏部此矯時懲弊

之權法非經國不刊之常典今吏部之法廢矣復宜掃而更之無容循默坐守利弊伏以爲當今選舉人未土著不必本於鄉閭鑒不獨明不可專於吏部謹詳度古制折量今宜謂五品以上及羣司長官俾宰臣進叙吏部得參議焉其六品以下或僚佐之屬許州府辟用則銓擇之任悉委於四方結奏之成咸歸於二部必先擇牧守然後授其權高者先署而後聞卑者聽版而不命其牧守將帥或選用非公則吏部兵部得察而舉之聖

主明目達聰逖聽遐視罪其私冒不慎舉者小加譴黜  
大正刑典責成授任誰敢不勉夫如是則接名僞命之  
徒非才薄行之人貪叨賄貨懦弱姦宄下詔之日隨聲  
而廢通計大數十除八九則人少而員寬事詳而官審  
賢者不獎而自進不肖者不抑而自退除隋權道復古  
美制則衆才咸得而天下幸甚或曰當開元天寶中不  
易吏部之法而天下砥平何必外辟方臻於理既濟以  
爲不然夫選舉者經邦之一端雖制之有美惡而行之

由於法令是以州郡察舉在兩漢則理在魏齊則亂吏部選集在神龍則紊在開元天寶則理當其時久承升平御以法術慶賞不軼威刑必齊由是而理匪用吏部而臻此也向以此時用辟召之法則其理不益久乎夫議事以制不以權當徵其本末計其遐邇豈時得時失之可言耶或曰帝王之都必浩穰輻輳士物繁合然後稱其大若權散郡國遠人不至則京邑索矣如之何又甚不然自古至隋數百千年選舉之任皆分郡國當漢

文景武帝之時京師庶富百廛九市不得顧車不得旋  
侈溢之盛亦云極矣豈待選舉之士爲其助哉又夫人  
有定土土無賸人浮冗者多則地著者少自隋罷外選  
招天下之人聚於京師春還秋往鳥聚雲合窮關中地  
力之產奉四方游食之資是以筋力盡於漕運薪粒方  
於桂玉是由斯人索我京邑而謂誰索乎且權分州郡  
所在辟舉則四方之人無有遐心端居尊業而祿自及  
祿苟未及業常不廢若仕進外絕要攢乎京惜時懷祿

孰肯安堵必貨鬻田產竭家贏糧糜費道路交馳往復  
是驅地著而安爲浮冗者也夫京師之冗孰與四方之  
實一都之繁孰與萬國之殷況王者當繁其天下豈屢  
閉之中校其衆寡哉或曰仕門久開入者已衆若革其  
法則舊名常調不足以致身使中才之人進無所容退  
無所習其將安歸乎既濟以爲人繫賢愚業隨崇替管  
庫之賢既可以入仕則士之不肖寧愧乎出流從古以  
然非一代也故傳云三后之姓於今爲庶今士流既廣

不可強廢但鍵其舊門不使新入峻其宦途不使濫登  
十數年間新者不來而舊者耗矣待其人少然後省官  
夫人之才分各有餘裕自爲情欲所汨而未嘗盡焉引  
之則長縈之則短在勉而已故凡士族皆稟父兄之訓  
根聰明之性蓋以依倚官緒無湮淪墊溺之虞故循常  
不修名義罕立此教使然也若惟善是舉不才決棄前  
見爵祿後臨塗泥人懷憤激孰不騰進則中品之人悉  
爲長材雖曰慎選捨之何適

選舉雜議凡七條○一或曰按國家甲令凡舉貢人本求才德不選文詞故律曰諸貢舉人非其人者徒注云謂德行乖僻者也居州郡則廉使升聞在朝廷則以時黜陟用茲懲勸足爲致理有司因循不修厥職浸以訛謬使其陵頽今但修舊令舉舊政則人服矣焉用改作答曰州郡以德行貢士禮闈以文詞揀才試官以帖問求學銓曹以書判擇吏俱存甲令何令宜修且惟德無形惟才不器搏之弗得聆之弗聞非在所知焉能辨用



今禮部吏部一以文詞貫之則人斯遠矣使臣廉舉但得其善惡之尤者耳每道累歲罕獲一人至如循常諄諄蚩駘愚鄙者或身甚廉謹政爲人蔽者或善爲姦濫秘不彰聞者一州數十人曷嘗聞焉若銓不委外任不責成不疏其源以道其流而以文字選士循資授職雖口誦律令手操斧鉞以臨其人無益也非改之不可○二或曰昔後漢貢士諸生試經學文吏試牋奏則舉人試文乃前王典故而子獨非於今何也答曰漢代所貢

乃王官耳凡漢郡國每歲貢士皆拜爲郎分居三署儲才待詔無有常職故初至必試其藝業而觀其能否至於郡國僚吏皆府主所署版檄召用至而授職何嘗賓貢亦不試練其選州陋邑一掾一尉或津官戍吏皆登銓上省受試而去者自隋而然非舊典也○三或曰若使外州辟召必是牧守親故或權勢囑託或旁鄰交質多非實才奈其濫何答曰誠有之也然其濫孰與吏部多請較其優劣且州郡牧守古稱共理政能有美惡之

跡法令有殿最之科分憂責成誰敢濫舉設如年多人  
怠法久弊生天網恢疎容其姦謬舉親舉舊有囑有情  
十分其人五極其濫猶有一半尚全公道如吏部者十  
無一焉請試言之凡在銓衡唯徵書判至於補授祇校  
官資善書判者何必吏能美資歷者寧妨貪戾假使官  
資盡愜刀筆皆精此爲吏曹至公之選而補授之際官  
材匪詳或性善緝人則職當主辨或才堪理劇則官授  
散員或時有相當亦幸中耳非吏曹素得而知也有文

無賴者計日可升有用無文者終身不進况其書判多是假手或他人替入或旁坐代爲或臨事解衣或宿期定估才優者一兼四五自製者十不二三况造僞作姦冒名接脚又在其外令史受賂雖積謬而誰尤選人無資雖正名而猶剝又聞昔時公卿子弟親戚隨位高低各有分數或得一人二人三人四人不在放限者禮部明經等亦然謂之省例斯非濫歟若等爲濫此則百倍而多者也○四或曰吏部有濫止由一門州郡有濫其

門多矣若等爲濫豈若杜衆門而歸一門乎答曰州郡有濫雖多門易改也吏部有濫雖一門不可改也何者凡今選法皆擇才於吏部述職於州郡若才職不稱紊亂無任責於刺史則曰官命出於吏曹不敢廢也責於侍郎則曰量書判資考而授之不保其往也責於令史則曰按由歷出入而行之不知其他也黎庶受弊誰任其咎若牧守自用則罪將焉逃必州郡之濫獨換一刺史則革矣如吏部之濫雖更其侍郎無益也蓋九流浩

浩不可得知法使之然非正司之過故云門雖多而易  
改門雖一而不可改者以此○五或曰今人多情故長  
恐許其選吏必綱紀紊失不如今已之有倫也答曰不  
假古義請徵目前以明之今諸道節度都團練觀察租  
庸等使自判官副將以下皆使自銓擇縱其間或有情  
故大舉其例十猶七全則辟吏之法見行於今但未及  
於州縣耳利害之理較然可觀何紀之失何綱之紊向  
令諸使僚佐書授於選曹則安獲鎮方隅之重理財賦

之殷也○六或曰頃年常見州縣有攝官皆是牧守所  
自署置正多苟且不議久長纔始到官已營生計迎新  
送故勞弊極矣今令州郡召辟則其弊亦爾奈何答曰  
國家職員皆稟朝命攝官承乏苟濟一時不日不月事  
必停省人雖流而責不及績雖著而官不成便身而行  
不苟何待若職無移奪命自州郡所攝之官便爲已任  
上酬知己下利班榮爭竭智力人誰不盡今常調之人  
遠授一職已數千里赴集又數千里之官挈携妻孥復

往勞苦必一周而在路料間歲而停官成名非知己之  
思後任可計考而得此之不苟而誰爲苟○七或曰今  
四方諸侯或有未朝覲者若天下士人既無常調久不  
得祿人皆嗟怨必相率去我入於他境則如之何答曰  
善哉問乎辟舉法行則搜羅畢盡自中人以上皆有位  
矣此祿之不及者皆下劣無任之人復何足惜當今天  
下凋弊之本實爲士人太多何者凡士人之家皆不耕  
而食不織而衣使下奉其上不足故也大率一家有養



百口者有養十口者多少通計一家不減二十人萬家約有二十萬口今有才者既爲我用愚劣者盡歸他人有萬家歸之內則二十萬人隨之食其黍粟衣其縑帛享其祿廩役其人庶我收其賢彼得其愚我減浮食之口二十萬彼加浮食之人二十萬則我弊益減而彼人益困自古興邦制敵之術莫出於是唯懼去我之不速也夫何患焉

請改革選舉事條○内外文武官五品以上

應非選司  
注擬者

右請宰相總其進叙吏部兵部參議可否○吏部尚書

侍郎右請掌議文官五品以上除拜六品以下攢奏兼

察舉選用之不公者

諸京司長官及觀察使刺史舉用僚佐有才職不稱背公任私者得

察舉彈奏非選

凡有所察郎中刺舉員外郎判成侍郎

用濫失不得舉

尚書署之而後行

諸官長若犯他過搜司自當彈奏即非吏部所察故云非選用濫失不得

舉餘所掌准舊若官長選用濫失有聞而吏部不舉請

委御史臺彈之御史臺不舉即左右彈之

按六典御史有糾不當者

即左右丞得彈奏

○兵部尚書侍郎右請掌議武官五品以上

除拜六品以下攢奏兼察舉選用之不公者

諸軍衛長官及節度

都團練使舉用將校才職不稱背公任私者得察舉彈奏非選用濫失不得舉

凡有所察舉及

臺省糾彈如吏部之法餘所掌准舊○禮部每年貢舉

人右並請停廢有別項經藝之士請於國子監六學中

銓擇

國子學大學四門學律學書學算學

○兵部舉選右請停廢

昔隋置折衝府

所以分鎮天下散兵及武太后昇平置武舉恐人之忘戰則武官武選本末可徵今內外邦畿皆有師旅偏裨將校所在至多誠宜設法減除豈復張門誘入況若此輩又非驍雄徒稱武官不足守禦雖習弓矢不堪戰鬪而坐享祿俸規逃征徭

○京官六品以下

應合選司

右

請各委本司長官自選用初補稱攝然後申吏部兵部吏部兵部奏成乃下勅牒并符告於本司是爲正官考

從奏成日計凡攝官俸祿各給半○府州佐官

別駕少尹五府

司馬赤令皆不在此限

右自長史以下至縣丞尉

諸州長史司馬或雖是五品以

上官亦同六品官法

請各委州府長官自選用不限土客其申報

正攝之制與京官六品以下同其邊遠羈縻等州請兼

委本道觀察使共銓擇補授○上州省事市令中州參

軍博士下州判司

錄事參軍不在此例

中下縣丞以下及關津鎮

戍官等右請本任刺史補授訖申吏部兵部吏部兵部

給牒然後成官並不用聞奏其員數不得踰舊制雖吏

部未報並全給俸祿若承省牒在任與正同去任後不

得稱其官職若州司以勞効未著而不申者請不限年

月並聽之○州縣右請准舊令州爲三等上中下縣爲五

等赤畿上中下其餘緊望雄輔之名請廢夫等級繁多則仕進淹滯使其周歷

即務速遷官非久安政亦苟且請減衆○六品以下官

資歷右並請以五周爲滿唐虞遷官必以九載魏晉以後皆經六周國家因隋爲四

近又減削爲三考今三四則太少其遷轉資歷請約修  
六九則太多請限五周庶爲折中

舊制

修舊制謂遷轉資次也但以官亦滿即任召用並無選數

若才行理績有尤

異者請聽超遷每長官代換其舊僚屬若有負犯及不  
稱職者請任便替若無負犯皆待考滿未滿者不得替  
○諸道使管內之人及州縣官屬有政理尤異識略宏  
通行業精修藝能超絕及懷才未達隱德丘園或堪充  
內官不稱州縣者

並申送吏部

將校偏裨有兵謀武藝或堪

充宿衛或可爲統帥者右請不限多少各令長官具述

才行謀略舉送朝廷皆申上吏部兵部各設官署以處

之審量才能銓第高下每官職有缺及別項任使則隨

才擢用

如漢光祿  
領三署郎

勲稱舉者舉主加階進爵得賢俊者

遷其官

若自用僚屬  
雖得賢不賞

禁約雜條○一諸使及諸司州府長官舉用僚屬請明

書事跡德行才能請授某官某職皆先申吏部兵部諸

使奏官兼帶職掌者即以職掌分其文武不計吏部兵

本官帶州縣職即申吏部帶軍職即申兵部

部謄其詞而奏

云得某使某軍  
司某州府狀稱

以元狀人入按每使每

司每州各爲一簿○一所舉官吏在任日有行迹乖謬

不如舉狀及犯罪至徒以上者請兼坐舉主其所犯人自依常法

本條一人奪祿一年諸使無祿者准三品官以料錢折納依時估計二人奪賜

無賜者貶其色降紫從三人奪階及爵有爵無階有階

及四人解見任職事官已上任者五人貶官節度觀察使降爲刺

史刺史降爲上六人除名雖六人以上有犯賊罪至流

以上者倍論之倍謂一人從二人之法二人從四人若

舉用後續知過謬具狀申述及自按劾者請勿論此謂



不審舉用  
失誤者

○一所舉官有因姦納賂而舉者有親故非才而舉者有容受囑託而舉者有所知不善而故舉者有犯一科請皆以罔上論不在官贖限囑託舉者兩俱爲首規求者爲從

評曰夫人生有欲無君乃亂君不獨理故建庶官昔有唐虞皆訪於衆則舜舉八元八凱四岳之舉夔龍稷契此蓋用人之大略也降及三代擇於鄉庠然後授任其制漸備秦漢之道雖不師古閭塾所推猶本乎行而郡

國佐吏並自獎擢備嘗試効乃登王朝內官有僚屬者亦得徵求俊彥暨於東漢初置選職推擇之制尚習前規左雄議以限年其時不敢謬舉所以二漢號爲多士魏晉設九品置中正蓋論閥閱罕考行能選曹之任益爲崇重州郡之刺史太守內官之卿尹大夫咸吏部所署而辟召及鄉里之舉舊式不替永嘉之後天下幅裂三百餘祀方遂混同中間各承正號凡有九姓大抵不變魏晉之法皆亂多理少諒無足可稱夫文質相矯有

如循環教化所由興喪是繫自魏三主俱好屬文晉宋  
齊梁風流彌扇體非典雅詞尚綺麗澆訛之弊極於有  
隋且三代以來憲章可舉唯稱漢室繼漢之盛莫若我  
唐惜乎當創業之初承文弊之極可謂遇其時矣羣公  
不議救弊以質而乃因習尚文風教未淳慮由於此緬  
徵往昔論選舉者無代無之或云官繁人困要省吏員  
或云等級太多患在速進或云守宰之職所擇殊輕或  
云以言取人不如求行是皆能知其失而莫能究所失

之由何者按秦法唯農與戰始得入官漢有孝悌力田  
賢良方正之科乃時令徵辟而常歲郡國率二十萬口  
貢止一人約計當時推薦天下纔過百數則考精擇審  
必獲器能自茲厥後轉益煩廣我開元天寶之中一歲  
貢舉凡有數千而門資武功藝術胥吏衆名雜目百戶  
千途入爲仕者又不可勝記比於漢代且增數十百倍  
安得不重設吏職多置等級遞立選限以抑之乎常情  
進趨共慕榮達升高自下由邇陟遐固宜驟歷方至何

暇淹留著績秦氏列郡四十兩漢列郡百餘太守入作  
公卿郎官出宰縣邑便宜從事闕略其文無所可否責  
以成効寄委斯重酬獎亦崇今之部符三百五十郡縣  
差降復爲八九邑之俊又不得有之事之利病不得專  
之八使十連舉動咨稟地卑禮薄勢下任輕誠曰徒勞  
難階超擢容易而授理固然也始後魏崔亮爲吏部尚  
書無問賢愚以停解日月爲斷時沉滯者皆稱其能魏  
之失才實從亮始洎隋文帝素非學術盜有天下不欲


權分罷州郡之辟廢鄉里之舉內外一命悉歸吏曹纔  
厠班列皆由執政執政參吏部之職吏部總州郡之權  
罔徵體國推誠代天理物之本意是故銓綜失叙受任  
多濫豈有萬里封域九流叢湊掄才授職仰成吏曹以  
俄頃之周旋定才行之優劣求無其失不亦謬歟爾後  
有司尊賢之道先於文華辨論之方擇於書判靡然趨  
尚其流猥雜所以閱經號爲倒拔徵詞同乎射覆置循  
資之格立選數之制壓例示其定限平配絕其踰涯或

糊名考覈或十銓分掌苟濟其末不澄其源則吏部專  
總是作程之弊者文詞取士是審才之末者書判又文  
詞之末也凡爲國之本資乎人毗人之利害繫乎官政  
欲求其理在久其任欲久其任在少等級欲少等級在  
精選擇欲精選擇在減名目俾士寡而農工商衆始可  
以省吏員始可以安黎庶矣誠宜斟酌理亂詳覽古今  
推仗至公矯正前失或許辟召或令薦延舉有否臧論  
其誅賞課績以考之升黜以勵之拯斯利弊其效甚速

實爲大政可不務乎

通典卷十八





總校官庶吉士 臣侍 朝

校對官中書 臣王鍾泰

謄錄監生 臣王思恭

欽定四庫全書薈要

史部

通典卷十九

二十

詳校官員外郎臣楊世綸



欽定四庫全書蒼要卷九千一百三十七

史部

通典卷十九

唐京兆杜佑君卿纂

職官一

伏義氏

太皞

以龍紀故為龍師名官

師長也龍化其官長故為龍師春官為青

龍夏官為赤龍秋官為白龍冬官為黑龍中官為黃龍張晏曰庖義氏將興神龍負圖而至因以名師與其官

也共工氏以水紀故為水師水名

共工氏以諸侯霸有九州者以受水瑞故

以水名其官神農氏以火紀故為火師火名

火德也故為炎帝春官為大火

夏官為鶡火秋官為西火冬官為北火中官為黃帝則  
中火也神農有火星之瑞因以名師與官也

### 雲師雲名

黃帝受命有雲瑞故以雲紀事春官為青雲  
夏官為緇雲秋官為白雲冬官為黑雲中官

為黃雲也黃帝有景雲之  
應因以名師與其官也

少皞摯之立也鳳鳥適至故

鳥紀為鳥師而鳥名鳳鳥氏歷正也

鳳鳥知天時故  
以為歷正之官

鳥氏司分也

玄鳥燕也以春  
分來秋分去

伯趙氏司至也

伯趙伯勞  
也以夏至

鳴至冬  
至止

青鳥氏司啓也

青鳥鵲也  
鳴立秋止鵲音晏

丹鳥氏司

閉也

丹鳥鷩雉也以立秋來立冬去  
大水為雉以上四鳥皆歷正之屬

祝鳩氏司徒也

祝鳩鵲也鵲鳩孝  
故為司徒主教民

鵲鳩氏司馬也

鵲鳩王鵲也摯而  
有別故為司馬主

制 鳩氏司空也

鳩鳩鵲也鵲鳩平均故為司空  
平水土鵲音尸鵲音枯鵲音旬

爽

鳩氏司寇也

爽鳩鷹也擊故為司寇主賊盜

鵲鳩氏司事也

鵲鳩鵲也春來冬

去故為司事鵲音骨鵲音陟

五鳩鳩民者也

鳩聚也治民尚聚故

交反似山鵲而小至春多聲

以鳩五雉為五工正

五雉雉有五種西方曰鵲雉東方為名曰鵲雉南方曰翟雉北方曰鵲雉

伊洛之南

利器用正度量夷民者也

夷平也

九扈為九農

曰鵲雉

正 扈止也止人使不淫放也扈有九種春扈鵲鵲夏扈

竊玄秋扈竊藍冬扈竊黃棘扈竊丹行扈喈喈宵扈

噴噴桑扈竊脂老扈鵲鵲以九扈為九農之號各隨其宜以教民事者也鵲音勅倫反喈音子夜反噴音壯革

反 自顓頊以來不能紀遠乃紀於近為民師而命以民

事

言德不能致遠瑞始以民事命官也此郊子對魯昭公之辭仲尼聞之曰吾聞之天子失官學在四夷乃

見於郊子而學之

又有五行之官是謂五官社稷五祀是尊是

奉

五官之君長能修其業者死配食於五行之神為王者所尊奉

春官木正曰勾芒

正官

長也取木生勾曲而有芒角其祀重也

夏官火正曰祝融

祝融明貌也其祀黎也

秋

官金正曰蓐收

秋物摧蓐而可收也其祀該也

冬官水正曰玄冥

水陰而幽

冥其祀修及熙焉

中官土正曰后土

土為羣物之主故稱后也其祀為勾龍焉在家則祀

中雷在野則祀社

唐堯之代命羲和欽若昊天歷象日月星辰

敬授人時

重黎之後羲氏和氏世掌天地四時之官故堯命之使敬順昊天昊天言元氣廣大星四

方中星辰日月所會歷象其分節敬記  
天時以授人也此舉其目下別序之

分命羲仲宅嵎

夷曰暘谷

宅居也東表之地稱嵎夷暘明也日出於谷而天下明故稱暘谷嵎夷一也羲仲居

治東方之官

寅賓出日平秩東作

寅敬賓導秩序也歲起於東而始就耕謂之東作東

方之官敬導出日平均次序東作之事以務農也

申命羲叔宅南交

申重也南交言夏與

春交舉一隅以見之此居治南方之官

平秩南訛敬致

訛化也掌夏之官平序南方化育之

事敬行其教以致其功四時同之亦舉一隅

分命和仲宅西曰昧谷

昧冥也日入於

谷而天下冥故曰昧谷昧谷曰西則嵎夷東可知此居治西方之官掌秋天之政

寅餞納日平

秩西成

餞送也日出言導日入言送因事之宜秋西方萬物成平序其政助成物也

申命和

叔宅朔方曰幽都平在朔易

北稱朔亦稱方言一方則三方見矣北稱幽則南稱

明從可知也都謂所聚也易謂歲改易於北方平均在察其政以順天常上總言義和敬順昊天此分別仲叔

各有允釐百工庶績咸熙

允信釐治工官績功咸皆熙廣也言定四時成歲歷以告

所掌

時授事則能信治百官衆功皆廣歎其善

內有百揆四岳

四岳分主四方諸侯者也周禮正義

曰四岳四時之官主四岳之事始義和之時主四岳者謂之四伯至其死分岳事置八伯皆王官其八伯唯驩兜共工放齊鯀四人而已餘四人無文可知故書傳云惟元祀巡狩四岳八伯堯始以義和爲六卿春夏秋冬者并掌方岳之事是爲四岳出則爲伯其後稍死分置八伯以九州而言八伯者據畿外八州也畿內不置伯以鄉遂之吏主之四岳之外更有百揆之官者但堯初天官爲授至堯試舜天官之任則謂之百揆舜又命禹



為百揆皆  
天官也

外有州牧侯伯

外置州牧十二及五國之長

虞舜有天下

以伯禹作司空使宅百揆

禹代鯀為崇伯入為天子司空治洪水有成功言可用之

棄作后稷播百穀契作司徒敷五教

布五常之教

皋繇作士正

五刑

士理獄官

垂作共工利器用

垂臣名共謂供其百工職事

伯益作虞

育草木鳥獸

虞掌山澤之官

伯夷秩宗典三禮

秩序宗尊也三禮天地人之禮

伯夷臣名姜姓

夔典樂教胄子

胄長也謂元子以下至卿大夫子弟以歌詩蹈之舞之教長國

子中和祇

和神人

命夔使勉之

龍作納言出納帝命

納言喉舌之官

聽下言納於上受上

益亦為六官以主天地四時也

崔靈

言宣於下必以信

恩曰自顓頊以來命南正重司天火正黎司地故重黎之後世掌天地官號曰羲和唐堯受之廼置天地四時之官命羲和之後使復舊職而掌天地之事又分命羲仲羲叔和仲和叔使主四時為六卿之任及其末年舜攝百揆政地官為司徒扶官為士冬官為司空春官為秩宗故尚書曰廼命羲和欽若昊天分命和仲和叔等使主四時之事又云百姓不親五品不邇契為司徒敬敷五教地官之事也皋繇作士五刑有服扶官之任也禹作司空以平水土冬官之職也伯夷為秩宗典朕三禮此春官之所司也又周禮正義曰稷為天官羲和為夏官共為夏后氏之制亦置六卿

甘誓曰廼召六卿是也

其官名

次猶承虞制

禮記曰夏后氏官百天子有三公九卿二十七大夫八十一元士

殷制天

子建天官先六太曰太宰太宗太史太祝太士太卜典

司六典

興猶法也此蓋殷時制也周制太宰為天官太

神仕

天子之五官曰司徒司馬司空司士司寇典司五

衆

衆謂羣臣也此亦殷時制也周制司士屬司馬太宰司徒宗伯司馬司寇司空為六官

天子之

六府曰司土司木司水司草司器司貨典司六職

府主藏六

物之稅者此亦殷時制也周制皆屬司徒司土土均也司木山虞也司水川衡也司草播人也司器角人也司

貨升人也升

天子之六工曰土工金工石工木工獸工

音革猛反

草工典制六材

此亦殷時制也周制皆屬司空土工陶

器人也木工輪輿弓廬匠車梓也獸工函鮑鞞韋裘也唯草工職亡蓋謂作荏革之器鞞音吁援反旋音方往

反五官致貢曰享

貢功也享獻也致其歲終之功於王謂之獻也太宰歲終則令百官府各

正其治受其會聽其致事而詔王廢置也

五官之長曰伯

謂為三公也周禮九命作伯

千

里之內為王畿千里之外設方伯五國以為屬屬有長

十國以為連連有帥三十國以為卒卒有正二百一十

國以為州州有伯

屬連平州猶聚也伯帥正亦長也凡長皆因賢侯為之殷之州長曰伯虞

夏及周皆曰牧

八州八伯五十六正百六十八帥三百三十六

長八伯各以其屬屬於天子之老二人分天下以為左

右曰二伯

老謂上公也

周成王既黜殷命叅攷殷官制為周

禮以作天地四時之名謂之六卿

政太宰為天官冢宰  
大宗為春官宗伯司

徒為地官司馬為夏官司  
寇為秋官司空為冬官

立天官冢宰掌邦治地官司

徒掌邦教春官宗伯掌邦禮夏官司馬掌邦政秋官司

寇掌邦刑冬官司空掌邦事

六官之職皆總屬於冢宰  
故論語曰君薨百官總已

以聽於冢宰爾雅曰冢大也冢  
宰則太宰於百官無所不主

各有徒屬周於百事

崔

恩曰夫百王不同各置官禮為禪讓相傳者亦不得不  
改但所以改者少非禪讓之世者變易必多以革人視  
聽所以禪讓不改多者以禪讓道同人未為弊故不改  
者多非禪讓之世須變人情故必多改故王者之與必  
有改官之禮此周  
禮所興之意也

歲終天子齋戒受諫

諫當有  
所改為

六卿以

百官之成質於天子

質猶平也謂平其計要

百官齋戒受質

受平報也

然後休老勞農

饗食之也

成歲事

斷計要也

制國用自周衰官失

而百職亂戰國並爭各有變易暨秦兼天下建皇帝之

號

五帝自以德不及三皇故自去其皇號三王又以德不及五帝自損稱王秦自以德兼二代故兼稱之

立百官之職不師古始罷侯置守太尉主五兵丞相總

百揆又置御史大夫以貳於相漢初因循而不革隨時

宜也其後頗有所改

孟康注漢書曰大司馬左右前後將軍侍中常侍散騎諸吏則為中

朝丞相以下至於六百石等則為外朝

王莽篡立慕從古官而吏民弗安

亦多虐政遂以亂亡

當更始之時官爵皆羣小賈豎語有曰竈下養中郎將爛羊胃騎都

尉爛羊頭

關內侯

光武中興務從節約并官省職費減億計

後漢

建武六年詔曰百姓遭難戶口耗少而官吏尚繁於是司隸州牧條奏并省四百餘縣吏職減損十置其一

廢丞相與御史大夫而以三司綜理衆務泊於叔世事

歸臺閣論道之官祇備員而已魏與吳蜀亦多依漢置

晉氏繼及大抵畧同

山公啟事曰晉制諸坐公事者皆三年乃得叙用其中多有好人令

逍遙無事臣以為畧依左遷法隨資裁減之亦足懲戒而官不失其用詔善之又傳立奏曰諸官有病滿百日

不差宜令去職優其

禮秩既差而復用

泰元六年改制減費損吏士職員

凡七百人

時議省州郡縣半吏以赴農功苟勛議以為省吏不如省官省官不如省事省事不如清

心昔蕭曹相漢載其清靜此清心也漢文垂拱幾致刑措此省事也光武并合吏員縣官國邑纔置十一此省官也魏太和中遣王人四出減天下吏員正始中亦并合郡縣此省吏也今必欲求之於本則宜以省事為先設官分職委事責成量能授任思不出位若欲省官竊謂九寺可并於尚書蘭臺宜省付三府至東晉桓溫又表曰愚謂門下三省祕書著作通可減半古以九卿綜事不專尚書今事歸內臺則九卿為虛設皆宜省并若郊廟籍田之屬則臨

爰及宋齊亦無改作

宋時定制新長吏有以父

母疾去官禁錮三年山陰令沈叔任父疾去職御史中丞鄭鮮之上議曰所以為其制者涖官不久則奔競互生故杜其欲速之情以申考績之實耳今父母之疾而加以罪名損義疾理莫比為大詔從之於是自二品以



上父母及為祖父母後者墳墓崩毀及疾病放屬輒去  
並不禁錮又劉祗為中書郎江夏王義恭領中書監服  
親不得相臨表解職也孝武詔曰昔二王兩謝俱至崇  
禮自今三臺五省悉同此例又詔曰方鎮所假禮白版  
郡縣年限依臺除食祿三分之一不給送

**官司有三臺五省之號**

三臺蓋兩漢舊名五

省謂尚書中書門下秘書集書省也

**郡縣有三歲為滿之期**

宋州郡縣居職者以三周

為小滿

**梁武受終多遵齊舊然而定諸卿之位分配四時**

說在列卿中

**置戎秩之官百有餘號**

梁武帝時置百二十五號將軍為二十四班

**陳遵梁制不失舊物**

陳依梁制年未滿三十者不得入仕唯經學生策試得第諸州迎主

簿西曹左奏及經為挽郎得任其諸郡唯正王任丹陽尹經迎得出身庶姓尹不得必有奇才異行殊勲別降

恩旨叙用者不在常例其相知表啟通舉者每常有之亦因年考校黜陟之既不為此式所以勤惰無解凡選官無定期闕即補多更年互遷官未必即進班秩其官唯論清濁從濁官得微清即勝於轉若有遷授或由別初任移轉一人為官則即諸官多須政勅陳書曰舊式拜官皆在午後唯拜蔡景歷為度支尚書日駕幸元武觀帝恐景歷是日不得預宴特令早拜

後魏昭成之即王位初置官司分

掌眾職

以燕鳳為右長史許議為郎中令

然而其制草創名稱乖疎皇

始元年道武平并州始建臺省置百官封公侯將軍刺史太守尚書郎等官悉用文人天興中太史言天文錯

亂當改王易政故官號數革

初道武制官皆擬遠古雲鳥之義諸曹走使謂之危

鳴取飛之迅疾也以伺察候宮禁謂之白鷺取其延頸遠視他皆類此

至孝文太和中王

肅來奔為制官品百司位號皆淮南朝改次職令以為

永制

凡守令以六年為滿後經六年乃叙

又作考格以之黜陟

太和十八年詔曰古

者三載考績三考黜陟朕今三載一考考便黜陟各令當司考其優劣為三等六品以下尚書重問五品以上朕與公卿親論善惡上上者遷之下下者黜之中中者守本位又宣武帝行考陟之法

任事上中者三年升一階散官上第者四載登一級孝

明以後授受多濫

自明帝孝昌以後天下多難刺史太守皆為當部督雖無兵事並立佐僚

所在頗為煩擾及東魏靜帝時齊神武作相高隆之表請自非實在邊要見有兵馬者悉皆斷之又時諸朝貴

多假常侍以取貂蟬之飾隆之自表解侍中并陳諸假侍服者請亦罷之又自軍國多事冒竊官者不可勝數隆之奏請復檢括得五萬餘人而羣小喧囂隆之乃懼而止

北齊創業亦遵後魏臺

省位號多類江東

以門下省掌獻納諫正中書省管司王言秘書省典司經籍集書省掌從

容諷議中常侍省掌出入

後主臨御爵祿犬馬

御馬及犬迺有

門閣御史臺察糾彈劾

儀同郡公之號籍以旃罽食賜十餘種其宮婢閹人商

人胡人雜戶歌舞人見鬼人溫富貴者萬數至末年太

宰三師大司馬大將軍三公等官亦

後周之初據關中

並增員而授或兩或三不可稱數

猶依魏制及平江陵之後別立憲章酌周禮之文建六

官之職其他官亦兼用秦漢

他官謂將軍都督刺史太守之類是也

隋文

帝踐極百度伊始復廢周官還依漢魏其於庶僚頗有

損益凡官以四考而代

又制凡官以理去職聽並執笏

至煬帝初存稽

古多復舊章

百官不得計考增級如有德行功能灼然顯著者擢之

大業三年始

行新令有三臺五省五監十二衛十六府

殿內尚書門下內史祕書

五省也謁者司隸御史三臺也少府長秋國子將作

水五監也左右翊左右驍左右武左右屯左右禦左右

候十二衛也左右衛身左右監門等凡十六府也或是

舊名或是新置諸省及左右衛武侯領軍監門府為內

官自餘為外官

於時天下繁富四方無虞衣冠文物為盛矣既

而漸為不道百度方亂號令日改官名月易圖籍散逸

不能詳備大唐初職員多因隋制雖小有變革而大較

不異

高祖制文官遭父母喪者聽去職

貞觀六年大省內官凡文武定

員六百四十有二而已

顯慶元年初制拜三師三公親王尚書令雍州牧開府儀同三

司驃騎大將軍左右僕射並臨軒冊授太子三少侍中

中書令諸曹尚書諸衛大將軍特進鎮軍輔國大將軍

光祿大夫太子詹事太常卿都督及上州刺史在京者

朝堂受冊又制文武官五品以上老及病不因罪解者

並聽同

龍朔二年又改京司及百官之名

改尚書省為中臺門下省

致仕例

為東臺中書省為西

咸亨元年復舊至於武太后再易

臺其餘官司悉改之

庶官或從宜創號

改尚書省為文昌臺門下省為鸞臺中書省為鳳閣御史臺為肅政臺及

諸寺衛等名又  
置控鶴府官員

或參用古典

政六尚書為天  
地四時之官

天授二年

凡舉人無賢不肖咸加擢拜大置試官以處之試官蓋

起於此也

試者未為正命凡正官皆稱行守其階高而  
官卑者稱行階卑而官高者稱守官階同者

並無行守字太后務收物情其年二月十道使舉人并  
州石父縣令王山耀等六十一人並授拾遺補闕懷州  
錄事參軍崔獻可等二十四人並授侍御史并州錄事  
參軍徐昕等二十四人並授著作郎魏州內黃縣尉崔  
宣道等二十二人並授衛佐校書御史等故當時諺曰  
補闕連車載拾遺平斗量把推侍御史挾脫校書郎試  
官自此始也

於時擢人非次刑網方密雖驟歷榮貫而敗輪

繼軌

神功元年制曰自今本色出身解天文者進轉官  
不得過太史令音樂者不得過太樂鼓吹署令醫

術者不得過尚藥奉御陰陽卜筮者不得過太卜令解  
造食者不得過司膳寺諸署令又制其有從勲官品子  
流外國官參佐視品等出身者自今不得任京清顯要  
等官若累階應至三品者不得進階每一階酬勲兩轉  
如先有上柱國者聽迴授替以上親必  
有異行奇材別立殊效者不拘此例

神龍初官復舊

號

凡武太后  
所政之官

二年三月又置員外官二千餘人

國初舊  
有員外

官至此大增加兼超授諸閣官為員外官者亦千餘人  
中書令李嶠初自地官尚書貶道州刺史至是召拜吏  
部侍郎嶠志欲曲行私惠求名悅衆冀得重居相位乃  
奏請大置員外官多引用勢家親識至是嶠又自覺銓  
衡失序官員倍多  
於是遂有員外  
員外官其初但云員  
外至永徽六年以蔣  
孝璋為尚藥奉御員外特置仍同正員自是員外官復  
有同正員者其加同正員者唯不給職田耳其祿俸賜



與正官同單言員外者  
則俸祿減正官之半

檢校試攝判知之官

攝者言勅  
攝非州府

版署之命檢校者云檢校某官判官者云判某  
官事知者云知某官事皆是詔除而非正命

逮乎景

龍官紀大柰復有斜封無坐處之誦興焉

景龍中有太  
平安樂長寧

宜城等諸公主及皇后陸氏妹郾國夫人李氏妹崇國  
夫人并昭容上官氏與其母沛國夫人鄭氏上官崇氏  
賀婁氏女巫龍西夫人趙氏皆叙用親識亦多猥濫或  
出自臧獲或由於屠販多因賂貨累居榮秩咸能別於  
側門降墨勅斜封以授焉故時人號為斜封官時既政  
出多門遷除甚衆自宰相至於內外員外官及左右臺  
御史多者則數踰十倍皆無廳事可以處之故  
時人謂之三無坐處謂宰相御史及員外官也  
先天以

來始懲其弊

玄宗御極宰相姚元崇宋璟兼吏部尚書  
大革姦濫十去其九時有殿中侍御史崔

涖太子中允薛昭諷帝曰先朝所授斜封官恩命已布而姚元崇宋璟等沮先帝之明歸怨陛下道路謗謠天下稱冤奈何與萬人為仇敵恐有非常之變上以為然迺下詔曰諸緣斜封別勅授官先令停任宜並量材叙用監察御史柳澤又上疏極言不可其斜封官得免罪戾已沐恩私旬月之內頻煩降旨前勅令至冬處分後勅又令替人却停將何以至開元二十五年判定職次止姦邪將何以懲風俗

著為格令

此格皆武德貞觀之舊制永徽初已詳定之至開元二十五年再刑定焉至二十八年又

省文武六品以下官三百餘員及諸流外番官等

蓋尚書省以統會衆務舉持

繩目門下省以侍從獻替規駁非宜中書省以獻納制

冊敷揚宣勞祕書省以監錄圖書殿中省以供修膳服

內侍省以承旨奉引

尚書門下中書祕書  
殿中內侍凡六省

御史臺以肅

清僚庶九寺

太常光祿衛尉宗正太僕大理鴻臚司農太府為九寺

五監

少府將作國子

軍器都水

以分理羣司六軍

左右羽林左右龍武左右神武為六軍

十六

為五監

衛

左右衛左右驍衛左右武左右威左右領軍左右金吾左右監門左右千牛為十六衛

以嚴其

禁禦一詹事府二春坊

有左右春坊又有內坊掌閣內諸事

三寺

家令寺率更寺

太僕

十率

左右衛左右司禦左右清道左右監門左右內侍凡十率府

俾又儲宮牧

守督護分臨畿服

京府置牧餘府州置都督都護太守

設官以經之置使

以緯之

按察採訪等使以理州縣節度團練等使以督府軍事租庸轉運鹽鐵青苗營田等使以毓財

質其餘細務因事置使者不可悉數其轉運以下諸使無適所治廢置不常故不別列於篇

自六品

以下率由選曹居官者以五歲為限於是百司具舉庶

績咸理亦一代之制焉

一歲為一考四考有替則為滿若無替則五考而罷六品以下

吏部注擬謂之旨授五品以上則皆勅除自至德之後天下多難甄才錄劾制勅特拜繁於吏部於是兼試官外郎倍多正員至廣德以來乃立制限州縣員外兼試等官各有定額並云額內溢於限者不得視職其有身帶京官冗職寄名清美東州縣職者云占闕焉即如正員之例官以二考而代無替四考而罷由是官有常序焉

## 第一歷代官制要畧

第三老五更

三公總叙

四輔二  
大附

太師

太

傅 太保 太宰 太尉 司徒 司空

大司馬 總叙三師三公以下官屬

第三宰相

并官屬

門下省

侍中

侍郎

給事中

散騎常侍

諫議大夫

起居

補闕

拾遺

典儀

城門郎

符寶郎

弘文

館校書

中書省

中書令

侍郎

舍人

通事舍人

集賢學士

史官

主

書

第四尚書上

尚書省

并總論  
尚書

錄尚書

尚書令

僕射

左右丞

左右司郎中

員外郎附

歷代尚書

八座附

歷代郎官

歷代都事主

事令史  
行臺省

第五尚書下

吏部尚書

侍郎

郎中

員外郎

司封郎

中

員外郎

司勳郎中

員外

郎  
考功郎中

員外郎

戶部尚書

侍郎 郎中 員外郎 度支部  
中 員外郎 金部郎中 員外

郎 倉部郎中 員外郎

禮部尚書

侍郎 郎中 員外郎 祠部郎  
中 員外郎 膳部郎中 員外

郎 主客郎中 員外郎

兵部尚書

侍郎 郎中 員外郎 職方郎  
中 員外郎 駕部郎中 員外

郎 庫部郎中 員外郎

刑部尚書

侍郎 郎中 員外郎 都官郎  
中 員外郎 比部郎中 員外

郎 司門郎中 員外郎

工部尚書

侍郎 郎中 員外郎 屯田郎中 員外郎 虞部郎中 員外

郎 水部郎中 員外郎

第六御史臺 御史大夫 中丞 侍御史 殿

中侍御史 監察侍御史 主簿

第七諸卿上

總論諸卿 少卿附

太常卿

丞 主簿 博士 太祝 奉禮郎 協律郎 兩京郊社署 太樂署

鼓吹署

太醫署

太卜署

廩犧署

汾祠署

太公廟署



光祿卿

丞主簿太官署珍羞署良醢署

衛尉卿

丞主簿武庫署武選署守宮署公車司馬令左右都候

宗正卿

丞主簿宗元署諸陵署太廟署

太僕卿

丞主簿乘黃署典廐署典牧署車府署諸牧署

大理卿

正丞主簿獄丞司直評事監

第八諸卿中

鴻臚卿

丞主簿典客署司儀署

司農卿

丞主簿上林署太倉署鉤盾署導官署苑總監諸倉監

司竹監

溫泉湯監

諸屯監

搜粟都

尉等官

典農中郎將等官

太府卿

丞

主簿

諸市署

平準署

左

右藏署

常平署

祕書監

丞

祕書郎

校書郎

正字

著

作郎

佐郎

校書正字附

太史

局令

丞

殿中監

丞

尚食局

尚藥局

尚衣局

尚舍局

尚乘局

尚輦局

奉御

直長

# 第九諸卿下

內侍省

內侍

內常侍

內給事

內謁者

監 內寺伯

掖庭局

宮闈局

奚官局 內僕局 內府局

少府監

少監

丞

主簿

中尚左尚右尚

織染

掌冶等署

暴室等丞

將作監

丞

主簿

左校署

右校署

甄

官署

中校署

東園主章令

國子監

祭酒

司業

丞

主簿

國子博

律學

書學

算學等博士

助教

太學

廣文

四門

軍器監

丞

主簿

甲坊署

弩坊署

都水使者

丞

主簿

舟楫署

河渠署

第十武官上

將軍總叙

左右衛

并親衛

左右驍衛

左

右武衛

左右威衛

左右領軍衛

左右

金吾衛

左右監門衛

左右千牛衛

左

右羽林衛

左右龍武軍

左右神武等軍附

第十一武官下

大將軍

并官屬

車騎將軍

衛將軍

前後

左右將軍

四征將軍

四鎮將軍

四安

將軍

四平將軍

雜號將軍

監軍

軍師祭酒

理曹掾屬附

三署郎官叙

中郎將

五官中郎將  
左右中郎將

虎賁

中郎將

四中郎將

東西  
南北

雜中郎將

折

衝府

果毅別將等附

三都尉

奉車

駟馬

騎

奉朝請附

## 第十二東宮官

太子六傅

三太  
三少

太子賓客

太子詹事

丞

主簿  
司直

太子庶子

中允

舍人

司議郎

中舍人

通事舍人

諭

德 贊善 崇文館學士 洗馬 文學

校書 正字 典膳 藥藏 內直 典設

宮門

太子家令

丞 主簿 食官署

等郎

太子率更令

丞 主簿

太子僕

丞 主簿 廐牧署

左

右衛率府

副率以下官屬

左右司禦率府

左右

清道率府

左右監門率府

左右內率府

太子旅賁中郎將

太孫官屬附

第十三王侯總叙

歷代王侯封爵

公主并官屬附

第十四州郡上

司隸校尉

州牧刺史

總論州佐

別駕  
治中

主簿

功曹書佐

部郡國從事

典郡書

佐

祭酒從事

中正

都督

總管節度團練都統等使附

都護

# 第十五州郡下

京尹

京兆尹

左馮翊

右扶

風 河南尹

留守附

郡太守

總論郡佐

郡丞

別駕

長史

司馬

錄

事參軍

司功

司倉

司戶

司兵

司法

司士

參軍事

經學博士

醫博士

中正

通守

五官掾

督郵

主簿

尉

五

郡尉

縣令

總論縣佐

丞  
百附

鄉官 鎮戍關市官

致仕官

第十六文散官

開府儀同三司

特進

光祿

大夫以下

武散官

驃騎將軍

輔國將軍

鎮軍將

軍以下

諸校尉附

勲官



内官 命婦附

第十七秩 祿秩

幹力

白直

仗身

庶僕

親事

帳内

執衣

防閤

邑士

士

力 門夫  
等並附

致仕官祿

職田公廨田

第十八秩 品一

并命數

第十九秩 品二

并命數

第二十秩 品三

并命數

第二十一秩 品四

并命數

第二十二秩 品五

# 職官一

歷代官制要畧

官數 官品 設官沿革 封爵  
三公 宰相 三老五更 祿

秩

## 官數

唐六十員

尚書云建官惟百鄭玄云虞官六十唐官未開堯舜同道或皆六十并屬官而言則皆有

百

○夏百二十員

尚書云夏商官倍則當  
二百鄭玄曰百二十  
○殷二百四

十員

明堂位二百鄭玄曰二百四十

○周六萬三千六百七十五員

內二

千六百四十三人外諸侯國官六萬一千三十二人按禮記王制計之殷制同

○漢自丞相至

佐史凡十三萬二百八十五員

哀帝時數兼諸府州郡胥吏

○後漢

七千五百六十七員○晉六千八百三十六員○宋六

千一百七十二員○齊二千一百三員○後魏七千七

百六十四員○北齊二千三百二十二員

並內官

○後周

二千九百八十九員

並內官

○隋一萬二千五百七十六

員

內官二千五百八十一外郡縣官九千九百九十五

○大唐一萬八千八百五

員

內官二千六百二十一外郡縣官一萬六千一百八十五

## 官品

周官九命○漢自中二千石至百石凡十六等○後漢  
自中二千石至斗食凡十三等○魏秩次多因漢制更  
置九品○晉宋齊並因之○梁因之更置十八班班多  
為貴○陳並因之○後魏置九品品各置從凡十八品  
自四品以下每品分為上下階凡三十階○北齊並因  
之○後周制九命每命分為二以正為上凡十八命○  
隋置九品品各有從自四品以下每品分為上下凡三  
十階自太師始焉謂之流內流內自此始焉

煬帝除上下附唯留

正從各  
九品

又置視正二品至九品品各有從自行臺尚書

令始焉謂之視流內視流內自此始○大唐自流內以

上並因隋制又置視正五品視從七品以署薩寶及正

祿謂之視流內又置勳品九品自謂衛錄事及五省令

史始焉謂之流外流外自此始

勳品自齊梁即有之

設官沿革

畧舉崇著者具當部之官長雖品秩下者亦附此

黃帝 六相

堯有十六相

為之輔相不必名官○少皞 司

徒

前漢嘗加大後漢又加大

司馬

項羽加大漢以後曰大後周又加大

司空

前漢加大改御史大

夫為之後周又加大

司寇

後周有內司寇卿後又加大

○唐

義和

義仲

義叔

和仲

和叔

州牧

○虞

太師

太保

納

言

隋及大唐嘗改侍中為之

后稷

秩宗

士

共工

虞

○夏

九卿

○商

太宰

晉宋齊梁陳改太師為之

太宗

太史

太祝

太士

太卜

司士

司土

司木

司水

司革

司器

司貨

太子太師

太子太保

太子太傅

太子太保

太子太傅

太子少傅

方伯

○周

太傅

少師

少保

冢宰

後周加大

宗伯

後周加大

內史

秦置內史治京師如諸郡守後周有內史中丞大夫隋改中書為內

史監令大唐亦嘗  
以中書為內史

太僕正

至漢為太僕梁為卿大唐嘗  
為司馭卿又嘗為司僕卿

大將軍

自戰國  
時楚置

前後左右將軍

周末  
置

○秦

太尉

左

右丞相

丞相

後周末  
加大

相國侍中

本丞相史隋改為納  
言又改為侍內大唐

嘗為納言或為左  
相或為黃門監

黃門侍郎

後周納言大夫大唐為鸞  
臺侍郎又改為門下侍郎

散騎常侍

魏加侍郎又加員外又  
加道直大唐分為左右

少府吏在殿中主發

書謂之尚書四人

漢置五人其一人為僕射四人  
分曹後漢為五曹至晉有六曹

尚書

令僕射

漢置左右大唐嘗改為左右匡政或為  
左右丞相武太后嘗為文昌左右相

尚書丞

至漢置四人後漢減二人為  
左右丞大唐嘗為左右肅機

御史大夫

大唐嘗為大司  
憲武太后又嘗

改為肅政又

**奉常**

漢改曰太常後改曰奉常又改為太

分為左右

卿大唐嘗為奉常

**郎中令**

漢為光祿勳後漢嘗為郎中

卿又嘗為司禮卿

之卿大唐嘗為司宰卿又

**衛尉**

漢嘗為中大夫令至梁

嘗為司膳卿又為光祿卿

衛

**宗正**

漢書改為宗伯至大唐嘗

**治粟內史**

漢改曰大

卿為司宗卿又嘗為司屬卿

曰大司農後漢末為大農魏為司農至梁

**主爵中尉**

漢

謂之卿後魏又加大大唐嘗為司稼卿

右扶風

**廷尉**

二漢梁北齊為大理梁謂之卿隋代曰

**典**

客

漢改為大鴻臚又嘗曰大行至梁除大字謂之

**典屬**

卿大唐為同文卿又嘗為司賓卿又為鴻臚卿

**國少府**

至梁謂之卿大唐嘗為內府監

**將作少府**

漢改為大



匠梁為大匠卿隋為將作大監又改為大匠大唐亦嘗為大匠又嘗為繕工監又嘗為營繕監又為將作監

中尉

漢武更名執金吾

中書謁者令僕射

至漢嘗以宦者為之魏為中書監令專掌

機務隋為內史監令尋改為內史又改為內書又為內

史令大唐復為中書令嘗為右相又為內史又為紫薇

令詹事大唐嘗改為端尹又嘗改中庶子庶子晉改庶

為詹事

為宮尹少詹事並為少尹

中庶子庶子

子為左

右隋罷中大唐

太子家令

大唐嘗為

率更令

大唐嘗為

嘗為左右中護

僕

大唐嘗為御僕大夫

率內史

理京師漢分為左右又置京兆尹左馮翊代之

郡守

漢改為太

守後魏每部置三太守隨置通

大中二大夫

大唐並為文散

守謂之二守隋之通守並佐貳

漢

領尚書事

至後漢為錄尚書事

三公曹尚書常侍曹尚書主

客公卿事

後漢改為吏曹主選舉又為選部魏為吏部  
宋嘗置兩員大唐嘗改為司列大常伯又嘗

為天

中書侍郎

東晉嘗為通事郎隋為內史侍郎又為  
內師侍郎大唐為內史侍郎又為中書

侍郎又為

御史中丞

後魏曰中尉大唐改治書侍  
御史為之嘗為司憲大夫

光祿

紫微侍郎

大夫

優寵者則一加銀章青綬至魏晉則又加  
金章紫綬齊嘗置左右至隋為散官

中散大夫

王莽置大

太皇太后卿長信少府

太后以下卿以至  
於陳自後魏無

皇

唐為文散

太后卿長信少府皇后卿大長秋

隋有令大唐  
改為內侍

中常侍

大唐為  
內常侍

都水使者

至宋嘗為水衡令梁曰大舟卿隋嘗  
為都水監大唐嘗為司津監又嘗為

水衡

驃騎

後漢加大將軍  
大唐為武散

游擊

大唐為  
武散

衛

車騎

驍

騎

梁置左右

伏波

騎

材官

輕車

樓船

橫海

護

軍

至大唐為勳官

度遼

貳師

蒲類

強弩

戈船

奮威

建威

積射

二十一將軍

奉車騎駙馬三都尉

至梁尚主者為之

司隸校尉

督察三輔隋有司隸大夫

刺史

刺史舉

郡縣至隋治人

都護

京兆尹

左馮翊

右扶風

特進

為文散

諸加官

左右曹諸吏散騎中常侍侍中為之

○後漢 賊曹尚書尚

書侍郎三十六人

初稱尚書郎中滿歲稱尚書郎三歲稱侍郎五歲遷大縣令魏有尚書郎

晉又有郎中隋初置三十六侍郎後置員外郎一人後又六曹各置侍郎每曹有郎有員外郎大唐改曹郎為

郎中祕書監

後又置今大唐嘗為蘭臺太史少監為侍郎又嘗為麟臺

武衛

至隋置左右大唐為

左右鷹揚衛

輔國

晉加大宋改為輔師大唐為武散

四征

四鎮

四安

虎牙

征虜

捕虜

橫野

鷹揚

討逆

討虜

破虜等將軍

四中將軍

都督

至晉加大

河南尹

留守

班同三司

前漢文帝以宋昌為衛將軍亞三司未為官也

儀同三司

魏有開府儀同

三司晉有開府儀同三司後魏有儀同三司北齊有開府儀同三司又有儀同三司後周有開府儀同又有上

八座○魏

五兵尚書

至後

開府儀同大將軍至隋為散官又諸衛各置開府一人

魏有七兵尚書隋曰兵部大唐嘗為司戎太常伯或為夏官或為武部又為兵部

度支尚書

吳有

戶部晉以後為度支至隋為民部大唐嘗為度支又為戶部

祠部曹尚書

至後魏有儀曹尚書

後周有禮部隋置禮部尚書大唐嘗為司禮太常伯或為春官又為禮部

殿中監

秩甚卑隋曰殿內監

大唐嘗為中

中衛

晉分為左右衛將軍隋改為左右翊衛大唐復為左右衛

中領軍

藥府大監

尋改曰領軍隋改為左右屯衛大唐嘗為左右戎衛又嘗為左右五鈴衛又為左右領軍

鎮軍冠

軍

游騎

大唐並為武散

四平

鎮北

虎威

撫軍

凌江

寧朔等將軍

行臺○晉

三公尚書掌刑獄起部

尚書

有事即置事畢即省

國子祭酒

唯宋曰總明觀祭酒大唐嘗為大司成又為成均祭酒

中軍

龍驤

寧遠

大唐為武散

○宋

殿中將軍○齊

都官尚書

至隋改為刑部大唐常為司刑太常伯又嘗為秋官又改為憲部又為刑部

○梁

太府卿

大唐嘗為外府卿又嘗為司府卿

雲麾

中武

壯武

明

威定遠

大唐並為武散

宇宙等大將軍始以太常等名卿分

為四時凡十二卿○後魏

柱國

至大唐為勳官

天柱二大將

軍諸少卿○後周軍器○隋左右武侯府大將

軍

大唐為金吾衛

左右監門府將軍

大唐改為衛府

大總管通守

佐太守

折衝府正議通議朝議朝請朝散等大夫

左右驍衛府

大唐除府字

○大唐

太子賓客

漢之四皓非官

左

右千牛衛 左右屯營

後改為羽林軍嘗改為衛

左右威衛

嘗改左右豹韜

衛

左右龍武將軍

平章事

知政事

參知機務

同中書門下三品平章軍國重事

節度使

採訪使

宣威

武散

懷化

歸德等將軍

並武散以授歸義蕃官

封爵

黃帝方制萬里為萬國各百里○唐虞夏建國凡五等

曰公侯伯子男○殷公侯伯三等

公百里侯七十里伯五十里

○周

公侯伯子男五等

公侯百里伯七十里子男五十里

周公居攝改制大

其封

公五百里侯四百里伯三百里子二百里男百里

○秦爵二十等

最高徹侯迺得

食縣其次關內侯食租稅於關內餘十八等大庶長以下則如吏職

○漢國王國侯亭侯

三等

王皆裂地侯以戶數為差分人自此始漢初論功封列侯者凡百四十三人食邑者除租每戶一歲

更輸錢二百

○後漢亦三等

皇子封王其郡為國其列侯雖冠鄧元勳不過四縣

○魏

王公侯伯子男次縣侯次鄉侯次亭侯次關內侯凡九

等

關內侯為虛封自此始

○晉亦有王公侯伯子男又有開國郡

公縣公郡侯縣侯伯子男及鄉亭關內等侯凡十五等

王大國二萬戶三軍兵五千次國一萬戶二軍兵三千下國五千戶一軍兵千五百其公之制如五千戶國侯



如不滿五千戶國並置一軍千人  
其伯子男以下各有差不置軍

○宋皆因晉制唯大

小國皆三軍

至孝建中凡國官屬不得稱臣於其主改稱下官

○齊因之梁因

前代

定制諸王言曰令境內稱之曰殿下公侯言曰敕境內稱之曰第下皆自稱曰寡人相已下表疏如

臣而不稱臣文書下羣官皆曰告

○陳有郡王嗣王藩王開國郡公開

國縣公侯伯子男沐食侯鄉亭侯開國中關外侯凡十

二等○後魏有王開國郡公散公侯散侯伯散伯子散

子男散男凡十一等

王食半公三分食一侯伯四分食一子男五分食一

○北齊

有王公侯伯子男六等○後周有公侯伯子男五等○

隋有國王郡王國公郡公縣公侯伯子男凡九等○大  
唐國王郡王國公郡公開國郡公縣公開國侯伯子凡  
九等並無其土加實封者乃給租庸自武德至天寶實  
封者百餘家自至德至大曆三年實封者二百六  
十五家

### 三公

夏商以前云天子無爵三公無官

伊尹曰三公調陰陽

○周以太

師太傅太保曰三公○漢以丞相大司馬御史大夫為

三公○後漢又以太尉司徒司空為三公

天地災變則皆策免自太

尉徐防始馬靈帝就長安拜張  
溫為太尉三公在外自溫始也

○魏晉宋齊梁陳後魏

北齊皆以太尉司徒司空為三公○後周以太師太傅

太保為三公

司徒為卿

○隋以太尉司徒司空為三公○大

唐因之

### 宰相

黃帝置六相○堯有十六相○殷湯有左右相○周成

王有左右相○秦悼武王始置左右丞相始皇又始置

相國○漢置丞相嘗置相國或左右丞相尋復舊成帝

改御史大夫為司空與大司馬丞相是為三公皆宰相也哀帝改丞相為大司徒亦為宰相○後漢以太尉司徒司空為宰相獻帝復置丞相○魏改丞相為司徒而

文帝復置中書監令並掌機密自是中書多為樞機之任亦宰相也又置大丞相及相國○晉惠帝改丞相為司徒尋復舊俱為宰相而中書監令常管機要亦是相也○宋齊梁陳並相因習或為丞相或為相國多非尋常人臣之職

或掌機密或錄尚書或綜朝權或管朝政或為侍中或給事中或受顧命皆為宰相

然中書職任機務之司不必他名亦為宰相其有侍中兼外官若宋王弘侍中兼內官若沈演之其例不少即非宰相並在當時委任而已

○後魏北齊亦置丞相俱為宰相尤重門下官多以侍中輔政亦宰相也○後周大冢宰亦其任也其後亦置左右丞相○隋有內史納言是真宰相

柳述為兵部尚書參軍機密又楊素為右僕射與高穎專掌朝政

○大唐侍中中書令

為真宰相中間嘗改為左右相他官參者無定員但加同中書門下三品及平章事知政事知機務參與政事及平章國重事之名者並為宰相亦漢行丞相事之例

也其同中書門下三品自貞觀中以兵部尚書李勣始

### 三老五更

禮天子父事三老兄事五更○後漢明帝以李躬為三老桓榮為五更安帝以李充為三老靈帝以袁逢為三老○魏高貴鄉公以王祥為三老鄭小同為五更○後魏孝文以尉元為三老游明根為五更○後周武帝以于謹為三老

### 祿秩

周制自天子至下士凡六等諸侯國君十卿祿

食二千八百八

十人卿四大夫祿

食二百八十八人

大夫倍上士

食七十人

上士倍

中士

食三十人

中士倍下士

食十人

下士與庶人在官者同

食九人庶人在官與未命為士者次國小國同

○漢制自中二千石至百石凡

十二等中二千石

月俸百八十斛

二千石

百二十斛

比二千石

百八十斛

石

八十斛

六百石

七十斛

比六百石

六十斛

四百石

五十斛

比四

百石

四十斛

三百石

四十斛

比三百石

三十斛

二百石

三十斛

比

二百石

二十斛

百石

十六斛

○後漢大將軍三公俸各三百

五十斛凡諸受俸皆半錢半穀延平中定制中二千石

月俸錢九千真二千石錢六千五百比二千石錢五千

米七十二斛四千石錢四千米六百石錢三千五百四百石錢二千

斛十五三百石錢二千米二百石錢一千百石錢八百米

臘及立春更班賜有差○宋制州郡秩俸多隨土所出

無有定准有父母祖父母年登七十者並給見錢其郡

縣田祿以芒種為斷此前去官者則一年秩皆入○梁

制一品秩萬石二品三品為中二千石四品五品秩為



二千石○後魏其祿每季一請諸宰人之官各隨近給  
公田刺史十五頃太守十頃治中別駕各八頃縣令郡  
丞六頃更代相付○北齊官秩一品每歲八百足從一  
品七百足二品六百足從二品五百足三品四百足從  
三品三百足四品二百四十足從四品二百足五品一  
百六十足從五品一百二十足六品一百足從六品八  
十足七品六十足從七品四十足八品三十六足從八  
品三十二足九品二十八足從九品二十四足執事官

一品以下給公田各有差○後周制祿秩下士一百二十五石中士以上至大夫各倍之上大夫是為四千石卿二分孤三分公四分各益其一公因盈數為一萬石其九秩一百二十石八秩至於七秩每二秩六分而下各去其一二秩一秩俱為四十石○隋京官正一品祿九百石其下每以百石為差至正四品是為三百石從四品二百五十石其每以五十石為差至正六品是為一百石從六品九十石以下每以十石為差正從八品

是為五十石其給皆以春秋二季刺史太守縣令則計  
戶而給祿各以戶數為九等之差二佐及郡守縣令京  
官給職分田一品者給田五頃至五品則為田三頃其  
下每品以五十畝為差至九品為一頃外官亦各有職  
分田又給公廨田以供○大唐定給祿之制京官正一

品

米七百石錢  
六千八百

從一品

米六百石

正二品

米五百石錢  
六千

從二品

米四百石

正三品

米四百石錢  
五千一百

從三品

米三百石

正四品

米三百石

六十石

從四品

米二百石

正五品

米二百石錢  
三千六百

從五品

百石錢  
千二百

米一百

正六品

米一百石 錢

從六品

米九石

正七品

米八石

六十石

錢二千

從七品

米七十石

正八品

米六十七石 錢一千六百

從八品

米六十二

一百

石 正九品

米五十七石 錢一千三百

從九品

米五十石

從並同外官各

降一等

其幹力及防閣庶僕並別給

内外文武官自一品以下並給

職田京官諸司及郡縣又給公廨田並有差

通典卷十九